



臣王先謙敬編
臣周澗著恭校

林七 丁丑原任廣東廣西總督金光祖奏臣前窺察眾情多有

猜疑隨將臣總督兩廣關防暫行祕藏託言失去今雖用原藏關

防綏輯人心然受兩粵重寄不能豫籌保固一旦被陷貽誤封疆

臣罪難道得旨金光祖身膺兩粵總督重任不能保守封疆致地

方陷賊前奏關防已失今又稱收藏如果收藏前具題失印之時

何不以此情密奏觀此明屬巧飾本應革職從重治罪念其與平

南王尚之信密謀反正復定粵東著革職仍留原任戴罪圖功○

甲申予故盛京工部侍郎敖色祭葬○江甯巡撫慕天顏奏定例

凡侵盜錢糧人犯限一年追納不完者本犯本身妻及未分家之

東華錄

康熙二十

子流徙財產入官今請於冊報之後發解之前有能全完者免其

罪部議不准得旨侵盜錢糧人犯於冊報之後發解之前全完者

免罪著為令○乙酉揚威大將軍簡親王喇布奏江西各屬招撫

偽官一千九百餘員兵丁家口三萬七千四百餘名下部知之○

奉命大將軍康親王傑書奏偽將軍樂燦呈繳偽印札率眾投誠

○江西總督董衛國奏偽總兵謝鎮國等率偽官三百餘員兵丁

一萬三千餘名投誠○丁亥調張士甄為吏部右侍郎由禮部調○揚

威大將軍簡親王喇布奏聞吉安逸賊韓大任等屯甯都樂安諸

處臣調兵三路進剿仍行文招撫今韓大任等意欲歸誠啟請轉

奏得旨前王輔臣等投誠俱已免罪復用近又特詔傳諭被脅從

賊官吏自拔來歸赦罪議敘簡親王即以此意曉諭韓大任等○

辛卯揚威大將軍簡親王喇布等奏偵得吳三桂所屬偽將軍七

人率賊三萬至宜章欲犯樂昌又欲分兵犯南安得旨逆賊至宜章屯駐復欲分兵犯南安勢必窺伺南韶簡親王宜豫爲守禦之策以固疆圉又潮州劉進忠劉炎等俱已歸誠粵省官兵無東顧之憂平南王尙之信將軍莽依圖卽親統滿漢官兵速赴韶州協剿湖南逆賊將軍舒恕領兵守南安南雄諸處爲韶州聲援或舒恕未便身離贛州亦當量遣官兵馳赴尋舒恕奏據副都統穆承格報逆賊於本月初五日攻韶州甚急臣卽與巡撫佟國楨總兵哲爾肯等會商遣署副都統赫勒布率滿漢官兵赴援得旨韶州江粵咽喉必爭之地尙之信莽依圖等以文到日卽率兵赴韶州舒恕亦相機應援簡親王仍分兵赴贛以資防禦○壬辰御史魏雙鳳奏先是直隸各省重案如在京秋審例俱豫期繕冊送京師命九卿科道會同覆覈分別情實緩決矜疑三等嗣以三逆變亂

東華錄

康熙二十

一

部議暫罷今請復舊制刑部覆俟滇黔蕩平然後舉行得旨秋審事關人命直隸各省重案定限送京覆覈如舊制行○甲午加浙江總督李之芳兵部尙書銜以恢復地方調度有功也○河道總督靳輔奏河道敝壞已極修治刻不容緩謹條列八疏以奏一挑清江浦以下歷雲梯關至海口一帶河身之土以築兩岸之隄一挑洪澤湖下流高家堰以西至清口引水河一道一加高幫闊七里墩武家墩高家墩高良澗至周橋閘殘缺單薄隄工一築古溝翟家壩一帶隄工並堵塞黃淮各處決口一閉通濟閘壩深挑運河堵塞清水潭等處決口以通漕艘一錢糧浩繁須豫籌畫以濟工需一請裁併河工冗員奏調賢員赴工襄事一請設巡河官兵奏入命議政王大臣九卿詹事科道掌印不掌印各官會同詳確議奏尋議黃河關繫運道民生固應急爲修理但目今需餉維殷

且挑浚役夫每日需十二萬有餘若召募山東河南等處不惟貧民遠役途食無資亦恐不肖官役借端擾民應先將緊要之處酌量修築俟事平之日再照該督所題大爲修治得旨河道關繫重大應否緩修並會議各本內事情著總河靳輔再行確議具奏○

丙申以鄂善爲甘肅巡撫

降級留任雲貴總督

○丁酉原任高雷總兵官祖

澤清奏罪臣東兵無術臨難偷生蓄恨兩年始得乘機斬賊率屬歸誠靜聽處分 上諭祖澤清先雖被脅從逆仍感恩歸正其加

都督同知仍管總兵官事○定遠平寇大將軍安親王岳樂等奏

臣等兩軍同駐日久糧芻甚艱宜分兵令穆占率往岳州水路夾

攻得旨大將軍貝勒尙善等前奏須得鳥船始可破賊已命江甯

巡撫慕天顏督造今將軍穆占卽統兵到岳州亦必俟鳥船告竣

然後進取度鳥船到彼正當隆冬水涸難以前進若俟來年水長

東華錄

康熙二十

三

進兵勢必坐守岳州虛糜日月穆占宜勿赴岳州以兵會簡親王

規取衡永諸處遏賊後路如此則粵東得以寬緩而粵西欲降者

亦可乘間來歸穆占等其卽率岳州官兵速赴茶陵攸縣與簡親

王兵合協力進取衡永諸處○廣西巡撫傅宏烈奏臣前請大兵

接應力任進取兩廣今廣東全省已定廣西乃臣專責無可他諉

臣與將軍莽依圖等議欲進兵廣西緣敕印未至無以爲信且臣

兵寡弱必得尙之信官兵同臣進取庶克有濟又收復廣西雲貴

須招集土司土司官員專取憑於印信若以廣西雲南各土司印

信頒發招撫一處卽給一新印以杜反覆則逆賊可不煩大兵而

滅矣臣標官兵經年缺餉兼少馬匹請量撥給以資進剿得旨覽

奏詞意忠懇傅宏烈可仍以廣西巡撫爲撫蠻滅寇將軍給以敕

印尙之信速遣所屬官兵與傅宏烈同定廣西土司印信禮部鑄

給其官兵錢糧令總督金光祖給銀十萬兩俟秋涼再發馬匹尋
又命戶部撥銀十萬兩解赴傅宏烈軍前○御史郝浴奏冊立
皇后大禮將行請停今歲秋決以廣 聖慈下部知之○戊戌加
鄖陽提督佟國瑤太子少保以安撫難民有功也○予故大學士
伊圖祭葬諡文僖○刑部等衙門議覆差往河工吏部侍郎折爾
肯等奏原任河道總督王光裕莅任以來不將隄岸修築堅固以
致新舊隄岸屢屢衝決淹沒民田房產至屬員侵蝕冒銷又不題
參王光裕應革職杖一百原任淮陽道令升浙江按察使張登選
原任管河同知管盡忠俱擬斬監候從之○庚子加封 慈和皇
太后之父原任都統精奇尼哈番佟圖賴一等公世襲妻覺羅氏
爲公夫人○以 世祖章皇帝乳母朴氏保育 先皇克昭敬慎
上幼時復殫心調護封爲奉聖夫人頂帽服色照公夫人品級

東華錄

康熙二十

四

○平南王尚之信奏原任鎮守瓊州總兵官佟國卿舉城歸正下
部議敘又奏海賊劉國軒踞惠州先從陸路窺新安已被官兵殺
敗又從水路抵東莞縣石龍地方希圖順流直薄省城臣統水陸
官兵分路夾剿劉國軒棄城奔竄僞總兵陳璉等以惠州歸正得
旨嘉獎下部議敘○辛丑以富鴻基爲禮部右侍郎由內閣學士遷○予
福建死事歸化縣知縣黃易官廕○甲辰 上御便殿召大學士
等入賜坐論經史大義因及前代朋黨之弊論曰人臣服官惟當
靖共匪懈一意奉公如或分立門戶私植黨與始而蠹國害政終
必禍及身家歷觀前代莫不皆然在結納植黨者形迹詭密人亦
難於指摘然背公營私人必知之凡論人議事間必以異同爲是
非愛憎爲毀譽公論難容國法莫追百爾臣工理宜痛戒若夫汲
引善類不矜己長同寅協恭共襄國事是又不可以朋黨論也○

大學士巴泰乞休得旨卿以年邁請休情辭懇切准原官致仕以遂爾志念爾效力有年清端勤慎將朕所御衣冠帶鞞特賜與卿用旌老臣以昭朕始終眷戀至意○以吏部尚書明珠戶部尚書覺羅勒德洪爲內閣大學士○以董國興爲河南巡撫原任湖廣巡撫

八月丁未定遠平寇大將軍安親王岳樂等奏探探總兵官陸道清請還雲南相機鼓勵土司 上遣陸道清回雲南宣布寬大德

意曉諭土司儻未便舉事亦聽其還鄉使彼父母妻子得以完聚其布政使周昌黃九疇仍留安親王所俟有機會題明遣往招撫

○江西總督董衛國奏逆賊朱統錫復犯江右已破貴溪瀘溪諸縣臣請親率所部官兵前往撲剿 上命董衛國便宜進剿○己

酉 上奉 太皇太后幸南苑○丙辰 上奉 太皇太后還宮

○丁巳廣東廣西總督金光祖奏撫臣傅宏烈已統兵西行又楚

東華錄

康熙二十

五

逆方偏韶城與我兵對壘乞多遣滿兵以資勦禦 上諭逆賊吳

三桂分遣賊兵侵犯廣東韶州廣西桂林諸處皆由大將軍安親王岳樂將軍穆占等擁兵坐守長沙不卽破賊平定湖南所致岳

樂等其以文到日卽分兵令穆占率赴樂昌諸處以斷來犯韶州賊兵後路夾而攻之度未可行穆占卽會同大將軍簡親王喇布

進取衡永諸處以斷侵犯兩粵賊兵後路其撫蠻滅寇將軍巡撫傅宏烈旣統兵赴援廣西聽其相機堵剿平定地方○戊午轉吳

達禮爲吏部尚書由禮部轉○以李天馥爲內閣學士由少詹事遷○加靖

逆將軍侯張勇少傅並太子太師以敘梨川殺賊功也○己未

上御經筵○癸亥先是鎮南將軍莽依圖奏臣自省城抵韶州見城北陸路逆賊掘濠數重與官兵對壘請發大兵星馳赴援至是

平南王尙之信又奏粵地土寇尙多潮惠人心未定且高州四府

屢報賊警臣屬官兵不得不留鎮省會得旨今將軍喇哈達賴塔等大兵至潮州劉進忠等俱已歸順海寇敗遁粵境悉平而尚之信又以土寇爲辭不離省城則逆賊各路來犯粵東又復可虞不但廣西難復楚賊難滅而廣東勢亦難保尚之信其以文到之日卽親統官兵速赴韶州與將軍莽依圖等併力剿賊○廣西巡撫傅宏烈奏臣率官兵進取廣西僞將軍趙天元等擁眾萬餘踞守梧州出城迎戰我兵水陸奮擊敗之遂復梧州趙天元等僅以身遁得旨嘉獎下部議敘○丙寅冊立公遏必隆女 妃鈕祜祿氏爲 皇后封佟氏爲 貴妃李氏爲 安嬪王佳氏爲 敬嬪董氏爲 端嬪馬佳氏爲 榮嬪納喇氏爲 惠嬪郭羅洛氏爲

宜嬪何舍里氏爲 僖嬪○奉命大將軍康親王傑書奏潮州府同知仇昌祚自齎奏還潮遇賊作亂卽引錐刺項自稱瘡啞堅不

東華錄 康熙二十 六

從賊請加旌敘得旨仇昌祚克篤忠貞堅守臣節殊爲可嘉可從優授爲僉事道留粵東遇缺補用○戊辰 上御太和殿受賀頒

詔天下○辛未轉伊桑阿爲戶部尚書由工部轉塞色黑爲禮部尚書

由兵部轉○甲戌鎮南將軍莽依圖奏投誠總兵黃四標逃奔入山投誠總兵薛起龍叛率賊眾四千屯駐江口擄掠民間子女臣調兵

省城今尚未至韶州官兵又不可動乞調附近之兵以資撲剿得旨駐守南安署副都統赫勒布就近領兵前往會同南雄總兵官

宋四箴等協力速滅叛賊黃四標薛起龍等以靖地方 九月丙子命山西提督周卞世公溫齊等赴湖廣協剿○先是

上諭內大臣覺羅武默納侍衛費耀色等曰長白山乃 祖宗發祥之地今無確知之人爾等前赴鎮守烏喇將軍處選熟識路徑者導往詳視明白以便酌行祀禮爾等可於大暑前馳驛速去至

是武默納等自長白山還京復命 上曰長白山發祥重地奇蹟甚多山靈宜加封號永著祀典以昭國家茂膺神貺之意著禮部會同內閣詳議以聞○予故左副都御史覺羅碩博會祭葬○奉命大將軍康親王傑書奏漳泉諸處平定臣等隨授都統賴塔平南將軍印選前鋒護軍二千餘名暫守潮州其內府佐領兵及喀喇沁土默特兵令將軍喇哈達率赴會城靖南王下官兵亦留守潮州令耿精忠但攜其護衛親軍與喇哈達偕來 上命耿精忠仍駐潮州復敕諭傑書及尙書介山侍郎吳努春等曰今當勦滅吳逆招攜撫順之時不宜遽調耿精忠還會城以疑眾心王及大臣等不將茲事豫行請旨卽撤耿精忠殊爲失計嗣今凡此等大

有關繫之事務熟籌請旨毋得徑行○戊寅福建總督卽廷相奏鄭逆僞監軍侍郎陳俞侯攜帶家口人丁自海上投誠○己卯福建總督卽廷相奏長泰縣天柱山最爲險要山海賊寇多聚於此臣調兵搜勦同原海澄公標總兵魏茂等殺賊三百餘名生擒僞提督中軍副將孫公等其僞總督林鳳等俱帶重傷逃遁天柱山已經蕩平又進勦東塚塔潭等處擊殺僞將軍吳田賊眾遠遁下部議敘○撫遠大將軍都統大學士公圖海奏臣自平涼親閱秦州清水隴州寶雞一帶隘口酌撥滿漢官兵防守今據諸路報稱

東華錄

康熙二十

七

副將紀魁元等敗賊於五盤山生擒僞參將等夸蘭大姜都納等敗賊於喬家山恢復塔什堡巡撫鄂善率領官兵敗賊於塘坊廟副都統鄂克濟哈率領官兵敗賊於芭蕉園並擒斬甚多獲器械不可勝計下部議敘○庚辰 上御懋勤殿諭講官喇沙里陳廷敬張英曰爾等每日進講啟導朕心甚有裨益嗣後天氣漸寒特賜爾等貂皮各五十張表裏段各二匹○福建總督卽廷相奏總

兵黃藍擊敗海賊於小盈提督段應舉等生擒僞將軍李復貴僞軍師林日向等下部議敘○辛巳 上御製詩二首及衣服等物

賜撫遠大將軍都統大學士公圖海○癸未揚威大將軍簡親王喇布等奏臣等或進取衡永或救援韶州必厚增兵力始克有濟乞多撥就近官兵星馳前至 上諭和碩額駙華善學士薩海率江甯所有盛京兵三百自京撥往漢軍兵三百徽州駐防滿兵五十蒙古兵六百速赴江西抵南昌日合多諾等兵多選有馬者率赴簡親王軍前以聽調遣華善所佩平寇將軍印留付署副都統科爾科代管理江甯事務至安慶見有撫標兵提督王永譽可量率所部兵往守徽州○甲申 上視 仁孝皇后山陵啟鑾○丙

戌 上謁 孝陵○戊子 上巡邊○乙未征南將軍穆占奏臣

等於本月初二日赴袁州察訪進兵道路卽赴樂昌如有未便則

東華錄

康熙二十

八

會合簡親王進取衡永又前議留臣兵每佐領四名於安親王所適兵部咨以文到日卽分兵赴樂昌用是悉師以往未獲分留長沙得旨穆占不進取樂昌又不赴茶陵攸縣徑回袁州以會同簡親王爲辭又自違本議將荆岳所帶官兵盡攜赴袁州不分留長沙殊屬不合穆占其速如前議分每佐領兵四名留安親王軍前其或進取樂昌或由茶陵攸縣進取衡永作速定議一面前進一面奏聞○戊戌先是 上諭議政王大臣等逆賊吳三桂憑江湖

之險抗拒大兵爲日已久不速剿滅湖南民困無有已時聞逆賊多備鳥船戰艦死拒我師我師亦宜倍製鳥船沙船更令鹽船多載糧米由江入洞庭盡占江湖斷賊糧道夾攻岳州如事屬可行應遣賢能大臣官員會同督撫剋期造船多設水師營兵同大兵齊進期於一舉滅賊但增船破賊事關緊要大將軍順承郡王勒

爾錦貝勒尚善等身在地方與賊逼近應否舉行著速議以聞至是勒爾錦等議若令舟師入洞庭盡占江湖斷賊糧道卽台新舊船艦亦不敷用久泊風濤我船不利若泊於南潯港一帶非並設陸路重兵則我船不得傍岸勢不能久占江湖阻賊餉路也但逆賊造船未已長江關繫最重當賊舟漸增之時我舟又非可驟得若豫行添造甚屬有裨烏船沙船可載數月之米其鹽船似應停止上命添造烏船六十艘戶部尚書伊桑阿赴江南同該撫速行督造俟船將告竣更添發綠旗官兵鹽船著停止○壬寅駕過達蘭蘇墨地方見一人臥道旁遣侍衛塞勒等往視之回奏言民王四海從邊外傭工還家因食盡飢餒臥不能起上曰誰非朕赤子此人飢餒臥深爲可憫爾等往噉以粥救之甦可攜以

來既至命大學士索額圖詳問其由令喜峯口駐防遊擊杜昇等

東華錄 康熙二十九年 九

善養之送回原籍○江西巡撫佟國楨奏招撫偽副將羅復彪等一百一十七員所部兵萬餘俱各還田里下部議敘○是月免江

南秦州宿遷水災及定遠等四州縣荒地賦

冬十月乙巳福建總督郎廷相奏逆賊朱寅突犯安溪縣城署縣事李鈺同千總張文福率兵奮擊斬僞提督林蕙徐化等並賊兵千餘餘潰遁下部議敘又奏按察使吳興祚招撫光澤山寇僞都督陳龍施建宇等二百十四員兵丁一萬九千五百餘名下部議敘○撫蠻滅寇將軍廣西巡撫傅宏烈奏臣闔門被難自幼子幼女暨家屬一百四十餘口盡爲逆賊李迎春執送吳三桂分散殺戮鎮臣楊國泰全家被害及各將士眷屬慘戮情形不得不造冊報部以請優卹用慰忠魂得旨卿爲國忘家志圖滅寇不意逆賊李迎春將卿全家並鎮臣楊國泰闔門解送誅戮朕心深爲憫惻

作何優卹著議政王大臣會同議奏尋議俟該將軍查明優卹從之○鎮南將軍莽依圖奏廣西巡撫傅宏烈遣臣書言傅宏烈僅以兵五千獨當西路恐力不能支請滿洲將軍一人率騎兵千餘來至粵西以壯聲勢得旨傅宏烈進定粵西獨當一路宜以重兵自隨可照廣西經制兵額便宜召募汛守新復地方兼剿賊寇又將軍穆占見領兵赴廣東夾剿韶逆俟穆占抵粵破賊之後與將軍莽依圖等會議作何分兵赴梧接應傅宏烈聽酌量以行○撫蠻滅寇將軍廣西巡撫傅宏烈奏揚武營總兵官會大職進剿逆賊於五屯所殺獲甚多復南平縣得旨嘉獎下部議敘○丁未福建巡撫楊熙奏逆賊朱統錕以前明宗室名號糾集黨羽盤踞山谷流毒三省臣已招撫偽總兵陳龍等隨遣按察使吳興祚星赴光澤率兵剿撫吳興祚設計遣投誠總兵蔡淑伴回賊營以作內

東華錄

康熙二十

十

應蔡淑隨差人密報投誠總兵陳龍復首先率眾斬關奪路官兵分道斫寨勦殺偽弁兵丁四千五百餘名獲朱統錕子朱義潛姪朱義質偽總兵馮珩等勢窮計迫執獻朱統錕並銀印一顆兵丁三千餘名又逆賊許志遠恃朱統錕犄角之勢屢抗我師今朱統錕被擒聞風膽落率眾投誠計偽官一百有八員兵九千一百餘名下部議敘○撫蠻滅寇將軍廣西巡撫傅宏烈奏平樂府昭平縣離省不遠爲賊犯梧出沒之地臣遣標下後營參將周光裕率兵進取擊敗賊眾斬殺無算恢復縣城得旨嘉獎下部議敘○靖南王耿精忠遣子顯祚入侍○庚戌以胡一璉爲廣西布政使

由原

任左江

道遷 ○癸丑 上還京師○奉命大將軍康親王傑書奏漳州

龍溪縣班山泉州南安縣五都同安縣三保谿等處地方逆賊立營結寨盤踞山谷騷擾百姓爲害已久臣遣前鋒參領都克納侯

馬三奇副將馮兆京副都統紀爾他布等分率官兵於班山等處地方進剿賊眾屢次擊敗並招撫偽副將黃邦漢等下部議敘○平南王尙之信奏招撫偽將軍楊鎮邦下部議敘○撫蠻滅寇將軍廣西巡撫傅宏烈奏臣遣標下參將李士文等率領官兵於賀縣擊敗賊眾恢復縣城但逆賊馬雄尙在臣以孤軍無援且桂林圍困日久臣欲親統全營往應又恐梧州有事滿兵不至難以接應桂林一省關繫甚重儻有不測慮寒投誠之心擬請敕鎮南將軍莽依圖或甯海將軍喇哈達等分兵接應庶可早奏蕩平得旨嘉獎下議政王大臣會同速議具奏傅宏烈又奏招撫偽監軍道周遴元總兵張宏參將侯鎮國等恢復鬱林等一州四縣得旨嘉獎下部議敘○甲寅諭議政王大臣等今韶州路通宜速發官兵接應粵西可移檄將軍莽依圖等分滿兵每佐領三名付統領江

東華錄

康熙二十

十一

甯兵額楚率赴梧州與廣西巡撫傅宏烈併力勦禦至兩廣兵餉及馬關繫緊要宜速給發以慰軍心所撥餉銀已至贛州今遣戶部員外郎莫羅馳驛赴贛隨都統勒貝兵以餉銀送往南雄到日令駐韶州將軍等遣兵迎取分發兩廣其遣撥馬匹令江西督撫選官押送總督金光祖軍前○靖逆將軍甘肅提督侯張勇四川陝西總督哈占涼州提督孫思克等奏厄魯特濟農等爲噶爾丹所敗逃至沿邊遠禁闌入塞內奪番目馬匹及居民牲畜守汛官兵驅之使出濟農等言我等鄂齊爾圖汗之子姪窮無所歸故至此聞噶爾丹復逞兵未已或來追我或趨喀爾喀俱未可知臣等竊思噶爾丹乃北厄魯特之首長兵馬眾多如果與兵卽內地亦宜嚴飭守汛官兵防護並驅逐濟農等出境又理藩院奏據張家口報稱厄魯特來使博瑞額葉圖等不敢歸言來時鄂齊爾圖汗

喀爾喀土謝圖汗曾夾攻我台吉近又聞歸化城來貿易人言喀爾喀色楞達什台吉率三百餘人將邀劫我等於汎界我等得在邊塞之內卽如金城之固請暫居此俟本地使來同歸 上諭大學士等聞厄魯特喀爾喀交惡興戎雖虛實未確朕統御寰區一切生民皆朕赤子中外並無異視厄魯特喀爾喀儻因細故交惡至於散亡朕心大爲不忍伊等向相和好貢獻本朝往來不絕若交惡果實當遣使評其曲直以免生民於塗炭如仰副朕一視同仁之意仍前和好相與優游太平朕大嘉悅焉但天寒路遠若遣使往回無餉馬馳驛之所或致有誤今厄魯特喀爾喀使至其令理藩院明白備檄交發來使傳諭之○廣東廣西總督金光祖奏臣已遣標下兵二千赴韶州俟大兵擊敗韶賊後臣卽撤回官兵率赴高州同總兵官祖澤清直取南甯等府得旨韶賊已爲我兵

東華錄

康熙二十

十一

擊敗宜乘此時速平廣西金光祖可撤回赴韶官兵同祖澤清進取南甯柳州諸處○鎮南將軍莽依圖奏僞將軍胡國柱馬寶等於九月二十四日率賊萬餘犯韶州渡河至蓮花山薄江甯大兵營統領江甯兵額楚等奮勇拒戰臣復自城中遣兵夾擊破其四營斬獲甚多賊敗走帽峯山下部議敘○奉命大將軍康親王傑書奏續順公沈瑞爲海寇執往臺灣其官兵家口散處無依應令會集一處 上命彙駐潮州以副都統張夢吉宋文科統之同將軍賴塔等協守地方其官兵俸餉令侍郎達都如舊撥給○丙辰安南將軍覺羅舒恕奏撫臣傅宏烈遺書於臣請滿洲大兵駐守梧州卽可親統官兵進定廣西今詔逆爲我兵擊敗機誠難得且南安有滿兵駐守平南王官兵復守南雄宜及此機會令都統勒貝率所部赴韶州協剿逆賊如此則傅宏烈請兵亦可便宜策應

得旨頃已令統領江甯兵額楚率滿洲大兵往援傅宏烈勒貝兵不必發往廣西但韶州所關甚要儻韶逆未平令勒貝星馳往赴同將軍莽依圖等協力剿滅○丁巳敕諭安南國王黎維禧曰逆賊吳三桂值明季闖賊之變委身從賊以父死賊手窮竄來歸

世祖章皇帝念其投誠從優漸進王爵授之軍旅委以事權異數殊恩振古未有爰及朕躬特進親王倚任等於腹心思禮加於勳舊方期其感恩圖報殫竭忠誠詎意吳三桂以梟獍之資懷狙詐之計陰謀不軌自啟釁端藉請搬移輒行叛逆煽惑奸宄荼毒生靈極惡窮兇神人共憤連年遣發大兵各路征剿秦隴底定閩粵蕩平惟吳三桂竊踞一隅苟延旦夕目今大兵雲集指日授首恐其窮迫逃竄滇南倚恃險阻致稽天討茲以王累世以來抒誠進貢恭順有年誼屬屏藩忠藎素著亂臣賊子諒切同仇今已遣撫

東華錄

康熙二十

三

蠻滅寇將軍廣西巡撫傅宏烈會同滿漢大兵平定粵西進取滇黔爾國壤地相接素知形勢王宜遴選將士協心勦力攻其險要搗其巢穴早靖逋誅之寇用彰忠義之猷懋賞崇褒朝有令典王其恪遵朕命剋期舉事以奏膚功○福建總督卽廷相奏逆賊朱寅勾連海寇橫肆鴟張臣遣海澄鎮總兵官黃藍等會同滿洲官兵三路進剿至灌口楊坑地方大敗賊眾連奪賊營七所陣斬一千餘名生擒僞左營將謝良楊德等六十餘員餘孽逃遁下部議敘○平南王尙之信奏請以弟尙之孝赴京效力允之○庚申定遠平寇大將軍安親王岳樂奏報馬棚逆賊於瀏陽縣地方騷擾焚掠臣遣副都統阿晉泰率兵四路剿殺大敗賊眾擒斬無算下部議敘○癸亥諭大學士等朕不時觀書寫字近侍內並無博學善書者以致講論不能應對今欲於翰林內選擇二員常侍左右

講究文義但伊等各供厥職且往城外不時宣召難以卽至著於內城撥給閒房停其升轉在內侍從數年之後酌量優用再如高士奇等能書者亦著選擇一二人同伊等入直爾衙門滿漢大臣會議具奏○乙丑鎮南將軍莽依圖奏韶州無警撫臣傅宏烈兵力單薄已遣副都統額赫納赴梧州協剿得旨寇犯韶州將軍莽依圖同額楚夾剿既大敗賊眾復行追擊仁化諸縣指顧悉平可謂智勇兼擅凡爲將者統兵滅賊底定疆圉不必一一俱俟中旨惟應機適變盡乃心力卽克副委任至意莽依圖當逆賊甫遁卽遣副都統額赫納等往援傅宏烈深可嘉尙頃已令統領江甯兵額楚赴梧州今既遣額赫納行卽令額赫納毋稽留肇慶疾赴梧州與傅宏烈同定廣西額楚赫勒布等仍留莽依圖軍○諭議政王大臣等將軍莽依圖等所遣大兵尙屬單弱今粵東已定韶潮

東華錄

康熙二十

十四

等處亦復無警可令平南王尙之信多選部下官兵付都統尙之瑛或總兵官王國棟帥赴梧州隨滿洲大兵接應巡撫傅宏烈同定廣西○丙寅鎮南將軍莽依圖奏韶州逆賊胡國柱等爲我兵擊敗震懼喪氣於九月二十八日棄帽峯山潛遁臣等卽分兵數道躡擊過樂昌遂復仁化縣得旨嘉獎下部議敘○丁卯予浙江死事把總左朝極官廢副將蘇木代世職○江西總督董衛國奏招撫廣信府僞總兵吳萬勝等一百十七員兵一萬五千餘名下部議敘○戊辰鎮南將軍莽依圖奏臣欲親提大兵進取廣西廣西定後乘勝卽取衡湘但此行務須窮賊根株不得不厚集兵力以往請於近地撥給兵馬以益臣軍得旨見在韶州莽依圖部下兵每佐領七名外又增統領江甯兵額楚署副都統赫勒布兵每佐領三名近都統勒貝又率每佐領兵二名前往兵數已增於前

莽依圖可留勒貝額楚守韶州親統大兵速赴梧州同巡撫傅宏烈平定廣西廣西定後或進取湖南衡湘諸處或徑取貴州斷賊後路聽便宜從事○庚午以喀代爲兵部尚書由左都御史遷馬喇爲工

部尚書

由禮部右侍郎遷

○撫蠻滅寇將軍廣西巡撫傅宏烈奏賊犯梧州

於昭平等處陣斬僞總兵張元乘勝逐北本月初三日復潯州府

獲賊船器械無算得旨嘉獎下部議敘○辛未轉祁通額爲工部

左侍郎以溫代爲工部右侍郎

由內閣學士遷

○免江西新建等十三州

縣旱災額賦

十一月乙亥戶部議准平南王尙之信奏粵省之廣肇南韶惠潮

等府陷賊時遭逆賊派加兵餉橫征害民今地方已經恢復請禁

革橫征私派以蘇民困從之○丙子調吳努春爲吏部左侍郎

由兵部

東華錄

康熙二十

五

調○奉命大將軍康親王傑書等奏夸蘭大杜巴等率兵敗賊朱

寅等於泉州關口總兵官侯馬三奇等敗賊於和平橋草蒲港地

方副都統伯穆赫林副都統倭申巴圖魯總兵官侯馬三奇三路

進兵敗賊於石井清寺等處恢復石井清寺等處得旨嘉獎下部

議敘○丁丑以噶爾圖爲內閣學士

由詹事遷

○福建總督郎廷相奏

署遊擊韓六合敗賊吳萬勝於崇安縣界擒僞總兵副將等二百

餘員殺賊二千九百餘級下部議敘○巳卯以金珙爲廣東按察

使

由廣東學士遷

○逆賊韓大任擁眾踞萬安縣梁口坐塘筆帖式以

其事聞得旨逆賊韓大任自甯都敗遁窮踞萬安必且與楚賊合

勢護軍統領哈堯山副都統席三雖已統兵前往恐兵力尙少簡

親王其速調滿漢官兵與哈堯山等併力進剿務期剪滅毋仍前

疏縱俾賊逸入湖南○予廣東死事遊擊侯進學文天壽官廕○

先是揚威大將軍簡親王喇布奏據報韓大任等欲渡河前遁楚賊來迎應乘其未合豫行剿滅但護軍統領哈堯山等部兵甚少若剿逸賊則無兵以遏楚逆若拒楚逆則追剿逸賊又復無兵今吉安無可調之卒臣等議分將軍穆占兵之半暫守永新安福令其半赴泰和萬安諸處遏禦賊寇得旨簡親王喇布自到江西並未建尺寸之功宴坐會城虛糜糧餉迨赴吉安以重兵圍城逆賊韓大任奔逸不能擊滅致韓大任竊踞甯都雖遣副都統布舒庫等率兵前往究未大創賊眾今韓大任等自甯都竄突延及萬安泰和諸處不能撲剿又以兵少具奏計喇布所轄滿漢官兵爲數不少一韓大任未能剿除任其出入宜卽嚴加處分念見在與賊相持姑俟事平日議罪其令將軍穆占率兵急赴梁口務速剪滅勿使蔓延至是穆占奏言聞吳三桂遣僞帥三人由永新犯吉安

東華錄

康熙二十

十

臣身在地方洞悉情形僞帥來犯非迎擊不可臣是以率兵前進於本月初三日已抵永新俟後軍一至卽剿除永新百里外所屯賊寇進取茶陵其逆賊韓大任應令簡親王喇布或和碩額駙華善率兵堵禦上復諭簡親王速調副都統布舒庫提督趙賴等所轄之兵亟滅韓逆將軍穆占身歷賊境必悉情形或先赴梁口協剿逸寇或已進取茶陵遏禦楚賊卽乘機平定湖南其詳悉籌度無失事機○轉郭丕爲兵部左侍郎以黨務禮爲兵部右侍郎

由內閣學士遷

○甲申平南王尙之信奏粵東平定臣請量留標下兵守

廣東省城盡率餘兵赴廣西圖賊從之○撫遠大將軍都統大學

士公圖海奏署副都統覺和托等敗賊於沙窩斬獲甚眾下部議

敘○丙戌以屯泰爲內閣學士

由太常寺卿遷

○己丑子故河南巡撫佟

鳳彩祭葬諡勤儉○辛卯大學士等遵旨選擇翰林內廷侍直列

名請旨始設南書房命侍講學士張英加食正三品俸供奉內廷其書寫之事一人已足止令高士奇在內供奉加內閣中書銜食正六品俸伊等居住房屋交內務府撥給又令大學士傅諭張英高士奇選伊等在內供奉當謹慎勤勞後必優用毋得干預外事其恪遵朕諭○庚子 上幸南苑行圍○廣東廣西總督金光祖奏江右道布政使司參議陳上年故請賜卹典部覆參議乃從四品官不及卹例得旨陳上年不受僞職病故可憫其給卹銀一百兩○禮部等衙門遵旨議覆長白山係本朝發祥之地祀典從崇但民舍遼遠不便建廟請封爲長白山之神初次往封遣大臣詣山擇地設帳幄立牌致祭其每年春秋二祭道遠路濶或雨水阻隔應交甯古塔官員在烏喇地方望祭凡遇恩詔差京官往祭者亦如之得旨是○壬寅贈死事江西上饒縣縣丞陳貞廣東合浦

東華錄

康熙二十

七

縣知縣金世爵官廕○免江南徐州山陽等十一州縣去年水災及江西浮梁安仁萬年旱災賦

十二月癸卯朔以廣東總兵官嚴自明爲鑾儀使○乙巳奉命大將軍康親王傑書奏海賊圍泉州府屬小營地方副都統楊鳳翔提督段應舉領兵往援擊敗賊眾生擒僞總兵黃忠等百餘水陸共殺賊三千餘人下部議敘○丙午征南將軍穆占奏十一月十四日臣等領兵至茶陵州知賊眾已遁隨令都統宜理布等領兵追剿賊眾奔入攸縣據河岸迎敵我兵奮勇前進奪取城門陣斬賊兵四千餘生擒百餘餘賊遁去茶陵攸縣均已恢復得旨嘉獎下部議敘又奏茶陵攸縣新復請調副都統龔圖率往長沙之兵及袁州總兵官趙應奎等來此戍守臣卽赴梁口剿賊 上諭會剿大兵爲數已多簡親王等其併力殺賊務卽殄滅穆占當以核

復茶陵攸縣事啟聞安親王而親統大兵底定湖南已而穆占又
奏逆賊吳三桂堅守衡州衡州茶陵相去甚近水陸兼通臣部兵
戰守未足乞調安慶提督王永譽率標下官兵前來併力得旨前
以徽州要地遣王永譽率兵駐守不便隔省調遣安親王軍前益
以副都統龔圖之兵爲數頗眾今將軍穆占已復茶陵攸縣將進
兵湖南安親王其速遣提督趙國祚盡率所部兵復量加滿兵往
守茶陵攸縣俾無誤穆占進剿安親王穆占更宜互爲聲援同心
協謀以期破賊○丁未 上還宮○庚戌 上親製日講四書解
義序曰朕惟天生聖賢作君作師萬世道統之傳卽萬世治統之
所繫也自堯舜禹湯文武之後而有孔子曾子子思孟子自易書
詩禮春秋而外而有論語大學中庸孟子之書如日月之光昭於
天岳瀆之流峙於地猗與盛哉蓋有四子而後二帝三王之道傳

東華錄

康熙二十

大

有四子之書而後五經之道備四子之書得五經之精意而爲言
者也孔子以生民未有之聖與列國君大夫及門弟子論政與學
天德王道之全修己治人之要俱在論語一書學庸皆孔子之傳
而曾子子思獨得其宗明新止至善家國天下之所以齊治平也
性教中和天地萬物之所以位育九經達道之所以行也至於孟
子繼往聖而開來學息邪說以正人心性善仁義之旨著明於天
下此聖賢訓辭詔後皆爲萬世生民而作也道統在是治統亦在
是矣歷代聖賢勩業守成莫不尊崇表章講明斯道朕紹 祖宗
丕基孳孳求治留心問學命儒臣撰爲講義務使闡發義理裨益
政治同諸經史進講經歷寒暑罔敢間輟茲已告竣思與海內臣
民共臻至治特命校刊用垂永久爰製序言弁之簡首每念厚風
俗必先正人心正人心必先明學術誠因此編之大義究先聖之

徵言則以此爲化民成俗之方用期夫一道同風之治庶幾近於唐虞三代文明之治也夫○辛亥廣東廣西總督金光祖奏海逆楊彥迪糾夥黨犯欽州遊擊劉士貴率兵追殺賊眾又遊擊高應臣會同參將薛保擊敗逆賊斬殺甚多下部議敘○癸丑廣東廣西總督金光祖奏請就近調撥滿兵馳赴粵東以爲後援 上責之曰進征廣西合計將軍莽依圖平南王尙之信巡撫傅宏烈並金光祖所轄之兵爲數已多金光祖正宜乘此機會效力先驅以贖前罪况傅宏烈當時未任封疆尙能募兵破賊直入粵西恢復梧州諸府鼓勵將弁爲國宣力金光祖本膺總督重寄會奏請同總兵官祖澤清取南甯柳州至今無意前進遷延時日反請濟師以爲後援殊屬不合其遵前旨速取南甯柳州○揚威大將軍簡親王喇布奏護軍統領哈堯山等啟云欲與逆賊韓大任戰而山

東華錄

康熙二十

九

路險狹騎兵難騁請調遣綠旗官兵相機剿殺否則分兵守隘斷其餉道賊即可破臣隨令總督董衛國酌調戍兵可緩者協力往剿 上諭護軍統領哈堯山副都統布舒庫席山雅秦提督趙賴等所統官兵頗多且將軍穆占擊敗楚賊收復茶陵攸縣逆賊韓大任已無外援宜乘此時卽行掃蕩乃稱山路險狹騎兵難用欲調兵守隘延引時日使賊得乘間固守殊誤機宜簡親王量調附近官兵並嚴檄哈堯山等乘賊勢蹙亟行剿滅未幾韓大任遁入興國寶石砦安南將軍覺羅舒恕以聞得旨簡親王前擁大兵圍韓大任於吉安未能殄滅致令遁出迨韓大任竊踞梁口而護軍統領哈堯山副都統布舒庫提督趙賴等又不能撲剿復使奔竄簡親王其嚴檄哈堯山等併力窮追務卽剪除若縱賊入楚從重治罪總督董衛國亦宜統兵協力進剿○甲寅征南將軍穆占奏

賊帥馬寶率眾赴衡州又賊二千餘屯踞宜章 上諭今賊盡赴衡州宜乘此時令粵東官兵就近由樂昌取宜章郴州則逆賊自難持久平南王尙之信不必赴梧卽速趨韶州同都統勒貝及統領江甯兵額楚進取宜章郴州永州穆占又奏安仁縣所屬高石地方有僞韶南將軍及監軍道駐紮茶陵州所屬石井地方有僞知縣駐紮卽遣官兵前往生擒逆賊譚文度僞知縣譚敦錫獲僞韶南將軍及僞監軍道關防下部議敘○乙卯江西總督董衛國奏恢復銅鼓營城斬殺賊眾三萬有餘招撫僞總兵袁菊茂等一千三百餘員兵丁五萬餘得旨嘉獎下部議敘○福建總督卞廷相奏建甯遊擊韓六合馬登瀛會同浙江湖標守備曹象恒等率兵抵桐木源大敗賊眾陣斬僞副將林秀卿盡平賊巢下部議敘○丁巳諭兵部廣東韶州地屬緊要一切軍務額楚若啟簡親王

東華錄

康熙二十

年

轉奏慮多遲誤其令額楚以江甯將軍卞統轄兵馬都統勒貝參贊軍務凡事許得專奏○辛酉太白晝見○甲子增內閣侍讀三員專管記載旨意並票籤翻譯磨對謄真等件○乙丑江西總督董衛國奏江西省城已有副都統多諾鎮守請身赴吉安會同大將軍簡親王喇布商酌勦禦機宜得旨董衛國親率標兵赴吉安與大將軍簡親王共圖殄滅逆賊綠旗官兵聽便宜調遣滿洲將軍毋得干預○撫蠻滅寇將軍廣西巡撫傅宏烈奏逆賊吳三桂僞總統馬寶取道宜章來犯前隊已抵富川祈更發一軍以爲後繼或合韶州大兵奪取宜章郴州隘口臣同將軍莽依圖進取平樂桂林則逆賊不能兼顧湖南可立下矣得旨頃命平南王尙之信將軍額楚都統勒貝等已統大兵速平宜榔等處傅宏烈可同莽依圖亟定平樂桂林諸處○丙寅刑部左侍郎董安國以疾求

寵允之○予四川陣亡將士世職○予故陝西巡撫賈漢復祭葬

○已巳 上恭進 太皇太后錦衣親撰表文○以馮甦為刑部

右侍郎金僑為廣東巡撫由左副都御史遷○以廣東高雷總兵官祖澤

清為鑾儀使○辛未靖逆將軍侯張勇等奏甘涼近南山一帶有

西海墨爾根阿喇奈多爾濟台吉等廬帳數千餘肅州境內游牧

番人頭目有濟農布第巴圖爾厄爾德尼和碩齊等廬帳萬餘皆

為噶爾丹所敗自西套來奔 上諭大將軍圖海身在陝西其沿

邊流番或令提督等率兵往逐或嚴飭邊汛官兵各固守汛地選

幹練人員至番人頭目處開誠曉諭令彼退回著大將軍圖海酌

量指授而行毋致生釁○壬申征南將軍穆占奏署前鋒統領塔

爾代率兵擊敗偽副將王科於鄯縣所屬二都村復擊敗偽總兵

黃士標於鄯縣城下復鄯縣得旨嘉獎下部議敘○免直隸任縣

東華錄

康熙二十

三

陝西甯夏被災額賦○是歲朝鮮來貢○人丁戶口一千六百二

十一萬六千三百五十七田地山蕩畦地四百九十八萬三千四

百六十二頃五十三畝徵銀二千一百一十二萬六千四百三十

六兩五錢有奇米豆麥六百一十八萬八千七百六十四石二斗

有奇草二百四十二萬二千六百一十九束茶一十五萬五千三

百六十五引行鹽三百五十九萬八千七百六十引徵課銀二百

二十六萬二千三百六十五兩八錢有奇鑄錢二萬三千一百三

十六萬五千三百六十有奇

臣王先謙敬編

臣周潤倫蕃恭校

康熙十七年戊午春正月己卯定遠平寇大將軍安親王岳樂奏都統覺羅晝特等率兵於十二月十四日大敗賊眾於平江復縣城得旨嘉獎下部議敘○庚辰鎮南將軍莽依圖奏臣前抵梧州聞吳三桂之孫吳世琮等來桂林誘殺孫延齡據其城吳三桂率眾於十一月初六日來衡州令馬寶由宜章入粵西臣以梧州桂林之閒平樂最爲要地非亟取不可因留總督金光祖駐梧州任轉輸防守之寄又遣官兵駐潯州以禦柳州南甯之寇撫蠻滅寇將軍巡撫傅宏烈於十二月十八日發自梧州臣於十二月二十日率師由封川趨賀縣會同傅宏烈進取平樂未幾金光祖奏逆

東華錄

康熙二十一

一

賊馬雄死於雒容柳州賊心惶怖臣欲仍遵前旨乘機進取橫州南甯以分賊勢率師於十二月二十日自梧州起行得旨梧州兩粵之界又爲將軍莽依圖等進兵後路頃將軍巡撫傅宏烈自梧州率兵會莽依圖等由賀縣進取平樂今總督金光祖復進取橫州南甯恐梧州兵力少莽依圖等身在地方情形緩急當所稔知應戰應守熟計而行務期萬全且平定廣西埽蕩雲南關繫緊要其同心協意共相圖度毋致疏虞○征南將軍都統穆占奏聞逆賊吳三桂自失茶陵攸縣等處饋餉不給軍士胥怨民多遠避且茶陵等地方新復亟須堅守臣惟俟安親王所遣滿兵及提臣趙國祚抵茶陵日並韶州滿兵平南王下綠旗兵何時由樂昌進取宜邨等處知會到時方可相機前發進取湖南逆賊韓大任等逸入楚境江西大兵宜追躡至湖南庶賊可撲滅新復地方亦可

無虞得旨前命平南王尙之信前赴韶州會將軍額楚等由樂昌進宜章郴永其進兵可否尙之信等尙未奏知穆占所領陝西荆岳諸處將士皆經簡擇平定湖南惟此精兵是賴茲當逆賊窮蹙之時卽宜速赴湖南殄滅兇醜不可待尙之信等兵坐失事機至江西大兵見在征討韓大任平賊之後自有措置豈可懸揣卽行指示穆占亦不必待江西兵至湖南卽鼓行滅賊亟靖疆場安親王亦宜速遣提督趙國祚赴茶陵其逆賊土地失守軍怨民遁情形可移會荆岳長沙大將軍王貝勒等知之又奏臣遣發官兵大敗賊眾於鄱縣斬獲偽副將總兵等十餘員下部議敘○江西總督董衛國奏逆賊韓大任李懋珠陳堯元等敗竄永慶廬陵間復奔閩川洞白楊坳上諭頃將軍舒恕奏韓大任等敗走興國寶石砦已嚴飭護軍統領哈堯山等速行追躡殲滅爲期今韓大任

東華錄

康熙二十一年

二

等復竄閩川洞白楊坳董衛國其疾往追勦務期撲滅○癸未諭傅宏烈齎奏官劉曉將軍傅宏烈爲國忘家黽勉效力所奏諸事俱係當今急務區畫周詳朕甚嘉納爾歸傳諭傅宏烈此後亦當整頓師旅速滅賊寇以副朕出民湯火至意○甲申命內閣傳諭平南王尙之信齎奏人曰爾等先王在時貢獻方物靡不竭誠二年以來粵東事變道路塞阻信使不通每念及爾先王素日忠貞不貳爲國忘家罔不憫傷今王克承先志恢復粵東使人遠來請安兼進橙子可嘉但用兵之秋非比無事之時况見此物不勝思念爾先王其安戢地方恢復粵西湖南以繼爾先王未盡之志朕心甚爲期望此等細務勞人費事勿復爲念以後著暫止○以張仲德爲廣東布政使由貴州鹽道遷○浙江總督李之芳奏江西偽總兵林爾瞻等竊據石壠地方臣遣都司王國賢等前往招撫林爾瞻

等率僞官百餘員兵丁二萬三千八百餘名投誠下部議敘○江西巡撫佟國楨奏僞總兵賴榮盤踞江廣交界九鄉地方出沒流毒已非一日臣與安南將軍舒恕南贛總兵官哲爾肯遣官招撫賴榮率僞官十七員兵丁一萬一千二百餘名投誠下部議敘○

乙酉河道總督靳輔遵旨覆奏臣前將河工事宜分別條奏蒙

皇上以河道關繫重大應否緩修命臣再議臣謹逐一再議題覆一用驢馱土可以節費前擬每日用夫十二萬有奇今改用夫三萬餘名驢三萬餘頭前限二百日完工者今改限四百日完工再於兩岸遙隄內築縷隄以束水築格隄以防決庶可不至潰決矣一洪澤湖下游高家堰西北一帶卽爛泥淺等處臣前奏因河工淺阻請於河身兩旁各挑引河一道今因正河全淤臣已興工挑濬通流今止須挑引河一道庶伏秋水漲淮行有路可無他虞一

東華錄

康熙二十一年

三

運河旣議挑深若不束淮入河濟運而仍留黃流內灌則不久復淤臣見在於高家堰臨湖一帶地方決口上緊築塞而隄工單薄之處惟幫修坦坡一法爲久遠衛隄之計若不及早幫修伏秋水漲勢必衝潰祈敕部照前估費卽行興工一運河以西臨湖一帶自武家墩至周家閘大小決口三四十處自周家閘至翟家壩其中成河九道之處若不乘時併行堵塞則清水潭萬難修治不特高寶等七州縣常經水患卽重運經過決口亦危險非常急宜堵築斷難議緩一挑濬運河並堵清水潭等決口於立春後興工限一百日完工請將康熙十七年漕運過淮之期畧爲寬限俟挑河成工開壩放船一開捐納事例以助河帑願捐銀者照例款上納願築隄者自行認地修築完工日咨部註冊統俟大工完日停止一中河分司向駐宿遷今缺裁歸併准徐道應令該道駐紮宿遷

以統轄漕運咽喉又山旰同知已歸併山清同知應改名山清旰
貽同知以兼職掌至一切工程凡用監理官一員必用分管佐雜
官六員查江南佐貳雜職閒員甚少臣請於東豫二省內擇其職
閒才幹者調用一前奏請設兵丁駐隄防守今思不若設立兵丁
協同築隄每兵一名管隄四十五丈保固三年從優拔補且令每
兵自募幫丁四名將黃河兩岸近隄荒地令幫丁耕種或有納糧
之地卽令業主爲幫丁庶人力益眾而防護更密奏入下議政王
大臣九卿詹事科道會議尋議政王大臣等議覆並如所請得旨
治河大事當動正項錢糧捐納事例候旨行其所稱沿河地畝撥
給兵丁又令地主作爲幫丁是否相合著再議餘如議○丙戌逆
賊吳三桂下僞總督董重民等自廣東解至京師 上諭大學士
等逆賊吳三桂背恩倡亂其荼毒生民肆行逆惡罪在賊渠吳三

東華錄

康熙二十一年

四

桂與脅從之人無涉彼所部人員如能悔罪投誠概行寬免屢經
有旨今僞總督董重民宜卽正典刑但朕已屢降旨寬宥爾等會
同兵刑二部堂官將董重民免死釋放同解罪人亦俱寬釋並交
與兵部俾各得所○己丑以金鉉爲左副都御史 由大常寺卿遷○江西

巡撫佟國楨奏逆賊韓大任等竄走萬安臣會同安南將軍舒恕
南贛總兵官折爾肯遣標下遊擊楊以松等於鷓鴣寨等處屢次
擊敗賊眾斬副將等十餘員殺獲賊兵六千餘人餘孽遁走汀州

下部議敘○壬辰以郭四海爲左都御史

由倉場侍郎遷

○乙未諭吏部

自古一代之興必有博學鴻儒振起文運闡發經史潤色詞章以
備顧問著作之選朕萬幾餘暇游心文翰思得博學之士用資典
學我朝定鼎以來崇儒重道培養人材四海之廣豈無碩彥奇才
學問淵通文藻瑰麗可以追蹤前喆者凡有學行兼優文詞卓越

之士不論已仕未仕令在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報督撫代爲題薦務令虛公延訪期得真才以副朕求賢右文之至意爾部卽通行傳諭於是大學士李燾等薦原任副使道曹溶等七十一人 上命俟各員赴京齊集之日請

旨其在外見任者不必開缺○丁酉征南將軍穆占奏臣遣發官兵屢敗賊眾於富茂灘斬獲無算復永甯縣得旨嘉獎下部議敘○戊戌諭議政王大臣等逆賊吳三桂等背恩倡亂荼毒生靈擾亂疆宇朕念切除兇志安民社仁育義正恩威並行大將軍等旣承簡任當厲忠貞之誼早奏戡定之勳以副朕愛民之意乃自用兵以來大將軍王貝勒將軍大臣等固有盡心王事已著勞績者亦有觀望逗留不思振旅邁進竟營私適己希圖便安或諉兵甲

東華錄

康熙二十一年

五

之未全或託舟楫之未具借端引日坐失事機者甚而干預公事挾制有司貪冒貨賄占踞利藪更有多方漁色購女鄰疆顧戀私家信使絡繹尤可異者新定地方亟宜安集乃於所在攘奪焚掠種種妄行殊乖法紀本宜嚴察職名從重治罪但時當進剿姑免處分策勵後效各路大將軍王貝勒將軍大臣等宜乘時進取恢復封疆拯救民命一切違法之事嚴加禁止如有不遵許督撫指參繩以重典兵丁廝役犯者其將領家主均行連坐官員犯者除本官重治外將帥分別議處地方官逢迎饋獻一併嚴懲如督撫不糾或被言官劾奏或爲被害首陳該督撫以徇庇論督撫提鎮等官自違禁條加倍究治其以此傳示內外嚴加曉諭俾一體遵行○庚子以戶部郎中王士正詩文兼優改授翰林院侍講○辛丑揚威大將軍簡親王喇布奏護軍統領哈堯山於本月初二日

領兵分路進剿大破賊渠韓大任陳堯元李茂珠等於老虎洞等處燒毀賊寨陣斬賊兵六千餘級擒殺偽總兵副將等三百餘名賊勢窮蹙詣康親王軍前投誠下部議敘

二月壬寅朔溫郡王佛永輝薨輟朝二日○甲辰諭兵部廣東兵變時被掠男婦子女可令平南王尙之信總督金光祖等嚴行察出令人民識認悉皆發還俾其父子夫妻完聚粵西平定之日將軍莽依圖傅宏烈等亦並察明被掠人口遣還原籍○江甯將軍額楚奏總督金光祖自潯州進攻失利得旨金光祖不守梧州希圖立功輕進失利梧州不無可慮萬一梧州失守則進取平桂大兵後路亦阻向調將軍莽依圖等速赴梧州因平南王尙之信不急發兵至韶州致誤軍行不可謂非王失機也梧州乃兩廣接壤要地不可不增遣重兵駐韶將軍額楚都統勒貝等卽率兵前往

東華錄

康熙二十一年

六

駐防尙之信亦多遣精兵協守駐顏將軍覺羅舒恕率兵往守南雄兼顧韶州大將軍簡親王量遣官兵與巡撫佟國楨總兵官哲爾肯等同守贛州尋傅宏烈奏吳逆悉其驍銳俱向廣西乞遣附近官兵星馳應援得旨額楚等速赴廣西與將軍莽依圖傅宏烈等共籌攻守之策兩兵旣合可著莽依圖總統額楚勒貝等參贊尙之信親率將士速進廣西接濟大兵若尙之信必難離會城宜多揀精銳速往應援額楚等兵旣進廣西將軍舒恕不必俟簡親王所遣之兵卽率師迅赴南雄尋尙之信奏臣奉命進取宜章郴永行至清遠以總督金光祖及高州等處報警遂還會城今潮陽諸處又報海賊突犯臣所屬官兵有限不能分應得旨潮州惠州旣有將軍賴塔靖南王耿精忠提督王可臣等鎮守勦禦海寇不爲不足今將軍莽依圖等深入廣西事機所繫甚重且廣西早定

則湖南之寇不敢自存尙之信其以沿海地方付賴塔等親往接濟廣西大兵毋誤軍事○乙巳諭將軍穆占爾所密奏事宜朕已知悉前議政王大臣所議因無接濟之兵令爾前進今賊韓大任窮蹙來歸諸處俱已剋復江西兩省將士皆有餘暇故著簡親王與爾會同酌議移文想尙未至爾是以先爲陳奏耳在廷所議乃合諸路情形統籌全局覽爾將軍等所奏各執己見者甚眾此皆無濟於事嗣後須當同心協力無負委任將軍身體如何彼處諸將士好否原奏發回特諭○丙午戶部議覆奉天府尹金鼐奏遼東生聚未眾且旗民錯處今欲清丈隱地必同盛京戶部履畝逐一查看萬一奉行稍有不善必致民人驚擾伏乞軫念窮黎不拘年限聽民自首令地方官每年清查毋論多寡隨查隨報庶幾國賦日增人民漸集從之○己酉 太皇太后聖壽節 上親撰

東華錄

康熙二十一年

七

表文率王大臣等詣 太皇太后宮上表行禮恭獻玉壺金爵等件○庚戌予故溫郡王佛永輝祭葬立碑諡曰哀○先是定遠平寇大將軍安親王岳樂奏提督趙國祚奉調茶陵理宜卽遣但趙國祚所駐乃邊疆要地日與逆賊礮火相加實難遣赴而他處等兵又不可撤今就近以守醴陵兵每佐領二人付署副都統公倭赫率赴茶陵駐守至是征南將軍都統穆占奏茶陵攸縣安仁永興鄱縣幅員遼闊與賊逼近臣等雖擊敗賊首郭應輔等而餘賊大半仍匿鄱縣山谷中且吳三桂盤踞衡州江之東岸有僞將軍馬寶等立營獨令倭赫控制諸地兵力殊單得旨穆占著俟簡親王至湖南日會同定議如協力同進則量留簡親王兵守茶陵攸縣等處若分路而行江西袁州已屬內地總兵官趙應奎可率標兵與倭赫併力趙國祚仍留長沙今江西已平簡親王進取湖南

其江西綠旗官兵聽隨宜調用○辛亥以邵甘爲倉場侍郎由左副都

御史

由詹事遷

○左副都御史金鉉奏向因用兵各省需員

甚急故令督撫坐名題補原爲一時權宜嗣因外題日多部議停止題補之例惟地方最緊要者聽其保舉題請近見各省每一缺出卽保舉一人不曰輕車熟路則曰人地相宜既有保舉字樣吏部不得不從臣恐從此效尤奔競徇情弊竇百出請嗣後湖南粵西見在用兵省分仍聽督撫保舉外其不用兵省分凡保舉題補之例應行停止至於保舉武官之例亦應一體分別酌定奏入下吏部議尋議凡非用兵之地督撫無得保舉題補其用兵之地保舉之官如不稱職仍治督撫濫舉之罪從之○己未 上御經筵

○先是撫遠大將軍都統大學士公圖海奏今諸路勦賊之際亦

東華錄

康熙二十一年

八

宜進取漢中興安但臣欲三路進兵而在秦之兵若留守諸處要害則僅可遣發一路請自京增遣大兵 上諭在陝滿兵爲數不少將軍侯張勇將軍王進寶王輔臣提督孫思克趙良棟總兵官高孟部兵尤多可與張勇等公同詳議以聞至是圖海等奏言臣等公議以將軍席卜臣西安副都統翁愛陝西巡撫杭愛領兵鎮守省城將軍畢力克圖副都統恰塔領兵守隴州寶雞關山等處內大臣坤巴圖魯侍衛副都統馬一豹領兵守潼關甘肅巡撫鄂善領標兵同副都統席第郎中拉篤祜等領蒙古兵守秦州將軍侯張勇駐莊浪以防邊四川巡撫張得地仍留延安鎮守延綏總兵官高孟統標兵備棧道諸隘賊寇臣親率將軍佛尼勒署副都統吳丹鄂克濟哈都統海爾圖西安副都統木成額副都統佟世德將軍王進寶王輔臣陝西總督哈占以滿洲漢軍綠旗兵一萬

三千餘人爲一路將軍阿密達率護軍統領傑殷副都統覺和托覺羅夸代四川總督周有德副都統吳國禎署副都統張所養涼州提督孫思克漢中總兵官費雅達以滿洲漢軍綠旗兵一萬三千餘人爲一路剋期前進提督趙良棟統標兵繼大兵之後鎮守西和禮縣得旨進剿逆賊固守秦中皆大將軍公圖海將軍侯張勇將軍王進寶等是賴應作何留兵固守秦地使無他虞作何進取漢興諸處規定四川圖海等協謀熟計相機而行○辛酉福建總督郎廷相奏海賊水師偽總督林英等犯泉州界提督段應舉遣標下參將朱起龍等率兵撲剿大敗之於日湖等處生擒偽總兵林耀偽副將黃宏等下部議敘○乙丑奉命大將軍康親王傑書奏逆賊韓大任陳堯元李懋珠等率僞官九百五十四員兵一萬三千三百一十九名投誠 上命遣兵驛送韓大任等來京○

東華錄

康熙二十一年

九

丁卯巳時 皇后鈕祜祿氏崩於坤甯宮 上輟朝五日諸王以

下文武官員及公主王妃以下八旗二品命婦以上齊集舉哀持服二十七日○以軍興免直隸各省文武官齊集舉哀制服及遣官進香○諭大學士等凡出征王貝勒及各官爲國討賊平定地方效力行間今令伊等妻服喪服朕心不忍其穿孝服摘耳環散髮俱著免○己巳奉移 大行皇后梓宮於武英殿○辛未鎮南將軍莽依圖奏臣等抵平樂圍其城賊水陸來援將軍巡撫傅宏烈都統王國棟率綠旗官兵與戰不勝臣等孤軍難以久留退至中山鎮乞罷臣將軍職任以警眾傅宏烈亦奏損兵失壘臣罪實無可寬但滿漢官兵各自調度非臣所得指揮儻益臣標兵專臣平定廣西之責而以金光祖堅守潯梧後路再令滿洲大兵或從韶州進湖南或仍駐肇慶以壯聲援庶可濟事得旨河水泛漲大

兵不能相援賊眾我寡以致失利莽依圖傅宏烈等皆著免罪傅宏烈既以兵少請濟師平南王尙之信可發精銳萬人多備火藥火礮速赴廣西應援將軍賴塔會同靖南王耿精忠率藩下兵千人並劉進忠標兵五千人付與都統馬九玉亦令疾趨廣西從莽依圖傅宏烈等併力破賊莽依圖傅宏烈以謀勇兼備並見倚任宜其相和協同心協衷謀濟國事滿漢官兵務令輯睦俟尙之信馬九玉兵及前所調將軍額楚等兵至或一路進發或滿洲綠旗兵分二路進發公同詳酌定議以聞總督金光祖已留官兵守潯身回梧州或卽駐梧州接濟糧餉或莽依圖等檄赴軍前並候酌行○是月免江西豐城等九縣去年水災賦

三月癸酉福建總督郎廷相奏海澄爲漳泉門戶今海逆登岸據有玉州等寨復分路侵犯石碼江東橋諸處臣已同副都統胡圖東華錄

康熙二十一年

十

海澄公黃芳世酌議發滿漢官兵前往應援但漳屬地方兵少防禦難周得旨海賊分路侵犯不可不亟發援師大將軍康親王速增大兵與郎廷相黃芳世協力固守漳泉海澄諸處勦滅海寇○乙亥征南將軍都統穆占奏大將軍簡親王所遣護軍統領哈堯山之兵來自長途馬多疲憊臣若俟之同行將值炎暑今當於署副都統公倭赫總兵官趙應奎至日委以地方卽行前進但茶陵諸處闊廣兵力未敷請先調江西兵內馬肥者每佐領二三人遣大臣一員率之速赴茶陵鎮守度簡親王兵必由茶陵進發臣等移兵候於耒陽郴州協謀以行得旨哈堯山等之兵長途馬憊不能疾馳穆占若俟彼同行徒稽進勦之期且茶陵諸處所繫亦屬重要理宜固守簡親王可就兵丁內擇馬健堪用者每佐領選二人授和碩額駙華善定南將軍印與學士薩海領之速赴茶陵與

倭赫等協同駐鎮哈堯山等至吉安稍休士馬卽繼簡親王進兵湖南共圖滅賊尋定南將軍額駙華善奏簡親王付臣每佐領兵二名但茶陵諸處止有倭赫一人其分汛防守實爲未足 上復

諭之曰江西通省所繫惟在茶陵大兵前進初無接濟之師將軍穆古簡親王等公同商酌選良將精兵留之茶陵保固江西務俾萬無一失○丙子湖廣提督伯佟國璠奏官兵進剿楊洪諸逆於房縣擊敗賊眾斬獲甚多生擒僞副將等五十二名復房縣得旨嘉獎下部議敘○戊寅諭兵部頃因江西底定因命大將軍簡親王進取永州寶慶遣將軍舒恕防守韶州南雄相機而行又令平南王尙之信發兵赴廣西調將軍額楚等自肇慶赴梧州今諸路並進滅寇恢疆正在今日總督金光祖又稱賀縣開建乃粵東門戶最爲要地守此二縣則兵餉可由封川輓運今閱報文將軍莽

東華錄

康熙二十一年

十一

依圖傳宏烈自平樂回軍儻莽依圖等還至肇慶德慶俾賊得據賀縣開建爲死守計則復圖進取殊屬不易梧州諸處將不可保卽恐東粵亦至動搖莽依圖等宜固守賀縣開建諸處遇有機會可乘卽行前進金光祖督運糧餉以給大軍毋致有誤○兵部遵旨議敘海澄公黃芳世之弟黃芳泰應授爲參將俟海澄公標下缺出補用得旨黃芳泰冒險請兵全家殉難忠貞可嘉著凡有總兵缺出一同開列具奏○壬午諭吏部戶部兵部朕統御寰區孜孜圖治期於朝野安恬民生樂業共享昇平乃副朕宵旰勵精之意不意逆賊吳三桂背恩煽惑各處用兵禁旅征勦供應浩繁念及百姓困苦不忍加派科斂因允諸臣節次條奏如裁減驛站官俸工食及存留各項錢糧改折漕白二糧顏料各物增添鹽課鹽丁田房稅契牙行雜稅宦戶田地錢糧奏銷浮冒隱漏地畝嚴行

定例處分用過軍需未經報部不准銷算以上新定各例不無過嚴但爲籌畫軍需早滅逆賊以安百姓之故事平之日自有裁酌各省督撫提鎮大小文武等官俱宜上體朕意下念民生潔己奉公愛惜物力務期早奏蕩平與民休息以稱朕乂安海宇至意○癸未平南王尙之信奏前奉旨命臣統兵親進廣西臣慮賊窺我兵旣撤必肆犯潯梧且高雷廉三郡新定人心尙未甯戢恐復爲逆賊煽惑再四熟籌不得不駐省會以圖肆應得旨尙之信藩下兵著精選萬人遣赴廣西停其親往仍駐守廣東省城兼顧惠潮毋致疏虞○奉命大將軍康親王傑書奏前令臣分發兵守潮州今海逆侵犯海澄諸處大兵不便分遣得旨平南王尙之信已停赴廣西見令兼顧惠潮而靖南王耿精忠將軍賴塔仍鎮守惠潮諸處大將軍康親王其速遣精兵勦滅侵犯海澄賊寇不必應援

東華錄

康熙二十一年

十一

廣東○甲申先是

上諭議政王大臣等岳州前後船艘多於賊

數倍合此船破敵何難之有乃尙善統兵駐岳已經數年未一大創賊寇今大將軍安親王岳樂旣克平江江西湖廣道路已通俟公溫齊等兵與陝西調往之兵到岳州日尙善可率所部大臣及每佐領兵五人赴長沙駐守令安親王率所部大臣選每佐領兵五人取岳州進取岳州時應遣將軍鄂內率舟師前進陸地則令滿漢官兵實土蘆固排列鹿角進偪賊壘晝夜火攻俾賊水陸應援不暇江之南岸石首縣城卽宜攻取水陸兵連營江岸或另立一營扼湖之險更於南潯港地方水陸立營斷賊後路安親王總統官兵相機勦援庶爲有濟不必令舟師往泊君山無用之地若準此而行斷賊餉道必能克取岳州至是尙善奏臣等數年與賊對壘並無寸效仰慰 聖懷今臣等仍願統率舟師務克岳州

以贖前罪得旨尙善等願率舟師自效可仍留岳州務痛懲前非滅賊收疆勉贖前罪○乙酉先是 上諭議政王大臣等韓大任既抵福州其江西追剿官兵度已回汛大將軍簡親王宜乘此機會統率大兵亟剿湖南逆賊一應機宜可與將軍穆占定議或併力會剿或分道進發相機速行一面奏報至是征南將軍都統穆占奏請令簡親王兵與其所部兵會合一路自茶陵取郴州未陽諸處卽自永州渡江向衡州得旨簡親王整頓兵馬速與穆占會合詳加籌畫令江西萬無他虞保固茶陵諸處及大將軍安親王後路然後會師一路進發平定湖南其護軍統領哈堯山追剿韓逆直抵福建軍士馬匹贏乏可將見在南昌馬一千解至簡親王軍前均給缺馬軍士○丙戌初祭 大行皇后 上親臨舉哀是

日 上除服○諭撫遠大將軍都統大學士公圖海卿前奏言秦

東華錄

康熙二十一年

十一

地遼闊畱守兵單今當進取漢中興安之期度果萬無一失有易復之機仍行進取但秦地所繫重大卿等親率大兵前進而王進寶孫思克等倚任諸臣俱在戎行脫行後更有他虞殊難遏禦宜暫停漢興之役固守所在要害廣布恩威從事招撫俟後有可取之機再行奏聞其謹祕之○諭議政王大臣等今逆賊侵犯潯州諸處梧州高州所關最要將軍莽依圖可駐鎮梧州若遇高州諸處有警卽行應援將軍巡撫傅宏烈整頓士卒俟進兵平樂桂林與將軍楚額都統勒貝署副都統穆承格同行如兵力未足許於莽依圖等兵內量調前進又諭議政王大臣等自逆賊吳三桂叛變以來大兵諸路征勦方平南王尙之信歸正之時將軍巡撫傅宏烈思念國恩密約反正所領官兵從未支領俸餉輒奮勇入粵西收復梧州等處殲戮渠帥屢奏捷功嗣以進取平桂規定滇黔

奏請迅發大兵以相助援因遣將軍莽依圖等協力恢取平桂本期莽依圖與傅宏烈併力平定廣西克濟大事不意莽依圖等兵抵平樂寸步不前藉口綠旗營壘失陷遽奔還中山鎮仍復畏縮退至賀縣又託言糧餉不繼徑回梧州德慶以傅宏烈恢復如許城池盡棄與賊今若梧州乏糧必將退回肇慶肇慶乏糧必將退回廣州儻廣州乏糧當復棄廣州而還耶如此懦弱多端託諉不惟誤西征之事卽粵東恐亦可虞頃有旨令莽依圖駐鎮梧州兼顧高州諸處嗣今宜痛改前轍鼓勵軍士勉圖後效相機剿賊底定封疆爾等其嚴行申飭○撫蠻滅寇將軍廣西巡撫傅宏烈奏粵西地方僅存梧州一府滿漢兵馬芻糧浩繁力難供應得旨大兵糧餉關繫殊急不可但取給廣西宜令廣東協濟平南王尙之信可支餉銀二十萬兩解赴廣西並令廣東督撫運致糧草俾無

東華錄

康熙二十一年

七

誤軍需○予陝西死事商南縣知縣盧僕官廕○丁亥釋祭大行皇后 上親臨舉哀○諭撫蠻滅寇將軍廣西巡撫傅宏烈覽

卿所奏安人心固內地剿賊之策一一悉備但所云頒旨及部議不甚如意又一時更換撫院藩司心甚疑畏等語以後朕自有裁酌奏內請將河南綠旗兵二千北邊綠旗馬兵一千福建藤牌手一千或江西贛州鎮標挑兵一千著前營遊擊管天祥帶領迅赴臣營臣得此精兵五千便可獨力前征等語但調北邊綠旗官兵路途遙遠不能無慮其廣東布政司一事高州官兵一事滿洲大兵一事已有密旨著部議卿爾忘家勳猷素著恢復潯梧斬賊渠魁屢屢有功因賊負固據險一時不能卽效卿宜愈加勤力勦撫粵西掃蕩逆氛以副朕倚任至意○辛卯以朱之弼爲工部尙書原任兵部尙書○癸巳平南王尙之信奏僞水師將軍杜輝之子杜國

臣向在廣東臣於本月初六日遣人送赴岳州 上諭杜輝原係雲南永北總兵官儻思念國恩傾心歸正於事甚有裨益杜國臣抵岳州日大將軍貝勒選賢能人員密遣至杜輝所曉以伊子來岳招令反正或杜輝實心歸化潛約何地乞遣其子或畏遣洩漏答以他言貝勒應審察情狀若杜國臣可遣度萬無可慮則遣之務俾有濟大事如稍有可疑切勿輕畀俟有機會布朕德意移書招致爾宜加意慎密勿致洩漏○乙未福建水師提督海澄公黃芳世奏海逆自敗遁之後集其餘夥數萬負嶠石碼城於三月初六日僞提督吳淑等率賊眾二萬有餘上岸副都統孟安等同臣標副將楊壯猷等率兵極力追勦擊沈賊船賊眾敗退下部議敘○丙申奉移 大行皇后梓宮往鞏華城與 仁孝皇后同安於享殿內 上親臨送○丁酉撫遠大將軍都統大學士公圖海奏

東華錄

康熙二十一年

五

臣等遣馬拉祜轉傳 上諭令流番各歸故巢已遵旨陸續出口但番情叵測宜遣重臣一員駐紮蘭州以西地方固守三邊得旨將軍張勇駐紮紮邊地年久深知地方情形著自蘭移駐甘州固守沿邊地方○庚子 上還宮○安遠靖寇大將軍貝勒尙善奏岳州原有烏船又奉旨派遣烏船一百艘沙船四百三十八艘官兵自陸路分布外餘配入烏船沙船兵數不敷須再調綠旗兵五千入臣等茲役入湖務期破賊得旨公溫齊等率往陝西所調滿漢兵以及船數乃尙善所備知宜早爲通計如有不足豫當奏請今各路赴調之兵俱抵岳州船艦營造已完乃始奏請添兵殊屬不合但尙善等旣稱茲役入湖務期破賊其令蔡毓榮率標兵三千並荊州隨征綠旗兵二千馳赴岳州與尙善協力擊破湖賊攻取岳州如荊州彝陵防禦兵少大將軍順承郡王參贊大臣總督蔡

毓榮公同斟酌調附近綠旗兵遣發汎守

閏三月壬寅定遠平寇大將軍安親王岳樂奏偏沅巡撫韓世琦招撫僞總兵揭玉慶等一百二十三名兵丁一千餘名都統覺羅晝特率領滿漢官兵進剿馬棚賊邱尙義於七家洞等處擒斬無算又招撫僞總兵朱永升等下部議敘○癸卯 上巡幸近畿○浙江總督李之芳奏浙省陸地逆賊雖經勦撫而沿海一帶鄭克塽賊船風潮來往不可勝計象山副將汪國祥温州鎮總兵官陳世凱等於正月初旬大破賊眾於廟嶺等處斬殺五百餘名獲器械無算下部議敘○江西總督董衛國奏逆賊韓大任等已赴閩投誠其逆黨郭應輔等尙據萬安太和等地方臣分兵四路進勦陣斬逆黨四萬有餘招撫僞總兵邱大臣等三百餘員兵丁四萬六千餘人下部議敘○戊申予死事陝西遊擊謝世忠守備林時

東華錄

康熙二十一年

十六

泰官廕把總王正隆給卹廕○癸丑廣東肇慶安塘司庫報三月

二十二日高雷總兵官祖澤清復叛二十四日提督王可臣病故

上諭平南王尙之信等祖澤清先經反叛及投誠之後隨加寬宥仍授總兵旋擢鑾儀衛使今復背恩反叛兇惡已極宜卽行誅滅以懲奸類平南王尙之信將軍莽依圖額楚巡撫傅宏烈總督金光祖等可會同商酌速行勦滅至廣東提督職任綦重王可臣旣經病故其令總兵官侯襲爵暫理事務與大兵協力勦賊○丙辰諭議政王大臣等海寇盤踞廈門諸處旬連山賊煽惑地方皆由閩地瀕海居民爲之藉也應如順治十八年立界之例將界外百姓遷於內地仍申嚴海禁絕其交通但窮苦之民一旦遷徙必棄其田舍難以爲生殊可憫惻可將本年地丁額賦差徭雜項盡行豁免該督撫揀委能員料理俾安輯得所勿致苦累○丁巳

上回宮○征南將軍都統穆占奏接大將軍安親王檄稱湘潭偽將軍林興珠遣人約降大兵方渡江駐湘潭以圖進取臣若俟簡親王至日方行恐失機會今議以南昌所屬付總督董衛國贛州南安付將軍舒恕令之駐守留每佐領兵二名於吉安令副都統一人領之防守泰和萬安諸處又留滿兵三百人於永新亦令副都統一人領之勦禦郭慶輔等賊兼顧茶陵後路又令袁州副都統席布率每佐領兵二名鎮守袁瑞臨江諸處兼顧安親王後路廣信尚有餘賊令總兵官許貞領標兵二千駐守其總兵官高登科標兵一千名贛州綠旗兵二千名聽簡親王統率前進簡親王抵茶陵日留所部才能大臣精銳官兵之半其餘簡親王率之仍遵前旨從臣兵所由之路進定湖南至攸縣最爲要地臣已留前鋒統領希福署副都統公倭赫之兵與將軍華善協同鎮守攸縣

東華錄

康熙二十一年

七

安仁諸處兼顧江西臣於本月十三日啟行進取耒陽郴州桂東桂陽得旨將軍舒恕見鎮南韶諸處不便更令移駐南贛其令巡撫佟國楨總兵官折爾肯駐守餘如所請當此逆賊震動之際穆占急宜進兵郴州耒陽以分賊勢耒陽諸處克復卽於上游渡江斷賊歸路與安親王協力勦寇如江未可渡則作渡江之勢畧定沿江北岸地方以張安親王大軍聲勢○鎮南將軍莽依圖奏所部滿洲蒙古兵馬多疲甲冑朽敝得旨莽依圖赴廣西不能奮力破賊輒自退卻前旣借口糧餉匱乏今又以兵無甲馬託詞具奏殊負委任且使賊勢益張廣東震動祖逆復叛本當嚴加治罪但時方用兵高州暫緩處分俟旋師日察議尋莽依圖以失利退兵致地方失陷自陳請罪乞罷將軍任 上復切責之曰莽依圖至平樂不能殲寇拓疆擅自退還致潯州諸處陷賊今乃云未至梧

州傳宏烈金光祖早已棄地明諉過於傳宏烈而巧飾妄奏殊屬不合宜立行處分但見在行閒其仍留將軍任圖功贖罪○征南將軍穆占奏江西長甯縣僞昭陽將軍下總兵謝聘等三十二員率領兵丁投誠○庚申兵部理藩院會題撫遠大將軍圖海奏厄魯特噶爾丹將攻西海厄魯特若來或入大草灘亦未可定又陝西總督哈占移臣部云西套厄魯特台吉等聞噶爾丹有三月內舉兵之語應遣人知會達賴台吉備兵待之得旨噶爾丹興兵往攻西海厄魯特如遠從達布素圖瀚海而去則無庸置議若來至近邊欲經大草灘前往則將軍侯張勇提督孫思克等務須令其堅立信誓不許騷擾人民仍整飭我軍嚴加防護一面放噶爾丹過一面奏聞儻或肆橫彊欲入邊將軍提督等固守地方一面堅拒奏報尋命拉篤祐前赴甘州一帶地方偵探消息○撫蠻滅寇

東華錄

康熙二十一年

六

將軍廣西巡撫傅宏烈奏潯協副將林大忠思南副將張文玉等率兵剿賊於容縣西山等處大敗賊眾擒斬無算復北流縣得旨嘉獎下部議敘○辛酉冊諡 大行皇后曰 孝昭皇后○癸亥湖廣總督蔡毓榮奏楊洪二逆既經剿除餘孽未靖臣遣襄陽總兵官劉成龍招撫僞官兵丁共五千八百餘人下部議敘○甲子上至鞏華城○乙丑月祭 孝昭皇后 上回宮○丙寅諭兵部朕巡視京畿見八旗亡故軍士葬地窄狹塋墓纍纍亦有竟無塋地者皆因郭外近地價值騰貴故不易得本朝軍士奕世效力行閒殞命疆場或身披重傷在家老死皆家業貧窮至不能營辦葬地朕每觸目甚深憫惻作何撥給地土俾八旗貧苦兵丁俱獲葬所令議政王貝勒大臣詳議以聞○先是甯南靖寇大將軍順承郡王勒爾錦奏前旨令總督蔡毓榮率兵五千至岳州但被標

兵自荊州以至彝陵諸路俱設汛防而大江賊船不時出沒滋陽逆賊復渡江置壘若蔡毓榮率兵赴岳則荊州諸處不無可慮得旨攻取岳州事機重大且大將軍貝勒尙善稱此番進湖必期破賊蔡毓榮之兵不可不遣順承郡王仍遵前旨行荊州兵旣未足可令河南南汝總兵官周邦甯率標兵一千五百人赴襄陽旣至順承郡王等量調襄陽總兵官劉成龍標兵赴荆防禦尋勒爾錦復奏劉成龍標下及援勦兵俱應留守各汛 上諭劉成龍標兵旣與地方相習可仍留襄陽周邦甯率兵徑赴荊州巡撫張朝珍於武昌諸處兵內調足二千代援勦兵與蔡毓榮偕往其援勦兵仍留荊州○丁卯定遠平寇大將軍安親王岳樂奏吳三桂僞親軍水師右翼將軍林興珠自湘潭遣僞官楊廷言等詣臣軍前投致降書隨遣副都統甘度海阿進泰以兵往迎又遣參領沙納哈

東華錄

康熙二十一年

九

率兵收取彼處船礮詎林興珠部下官兵潰散甘度海阿進泰不守湘潭將見獲之船盡行燒毀率領林興珠來至軍前沙納哈還亦並無船艦收獲得旨林興珠不忘國恩率其所屬人員傾心歸正深爲可嘉其從優封侯爵授建義將軍留安親王軍前勦撫賊黨楊廷言等亦與議敘伊等妻子該督撫安插撫恤務令得所副都統甘度海阿進泰貽誤軍機情罪可惡著革職逮至南昌收繫○福建總督郎廷相奏逆賊蔡寅擁眾數萬駐紮天寶山截我糧道臣遣發官兵會同海澄公黃芳世於本月初一初二兩日連敗賊眾陣斬僞提督楊甯等三十六員擒賊弁一百二十餘員斬兵二千九百餘人奪營寨二十四所下部議敘○己巳征南將軍額駙華善奏茶陵爲江西門戶重地將軍穆占留兵甚少恐吳逆乘閒自衡州出犯安仁攸縣諸處請增設大兵爲防禦計得旨茶陵

攸縣關繫江西全省將軍穆占因聞安親王渡江故率兵深入乃安親王實未渡江儻逆賊聞道來侵江省可慮簡親王其與將軍華善前鋒統領希福將軍薩海等共商鎮守茶陵諸處以兵付護軍統領哈堯山由穆占進兵之路急行追及併力破賊穆占軍前聲息及逆賊情形簡親王不時奏聞

夏四月庚午朔漳州安塘筆帖式報副都統伯穆赫林海澄公黃芳世等師次灣腰樹與賊蔡寅戰失利平和失陷賊偏潮州立營得旨大將軍康親王兵旣分援諸路蒙古兵復撤回閩中兵力似單今浙江平靖可於杭台衢三府滿洲蒙古漢軍兵內選六百名令副都統雅塔理率赴福建到日聽康親王調遣並檄將軍喇哈達賴塔靖南王耿精忠等交相計議剿滅漳潮聞賊寇○甲戌海澄公黃芳世奏閩省變亂時臣叔黃梧弟黃芳度所部官兵並已

東華錄

康熙二十一年

二十

離散臣抵漳之後頗復收集請減兵額爲三千付臣弟黃芳泰統轄總督郎廷相奏海逆勢焰日盛句連山賊互相應援臣標兵止二千五百所在告警不能分應請增臣標兵二千五百設立五營今韓大任投誠之兵見給糧餉卽以此兵補入臣標可不煩別糜糧餉 上諭海澄公黃芳世收集之兵往時遭亂堅守孤城效力勞苦今逆氛未靖不當令其分散宜如所請以三千人隸籍支給糧餉黃芳泰已授京口左路總兵官其令黃芳世標員分轄此兵總督郎廷相奏增兵二千五百設五營亦如所請但韓大任之兵新經招撫不宜聚處一軍大將軍康親王及參贊大臣將軍耿昭忠及該督撫提等詳議將撫提標舊兵與新附之兵相參配合以足兵額統轄官員該督選擇題補○諭兵部逆賊祖澤清背叛已調平南王尙之信副都統額赫納等率兵進剿復遣將軍傅宏烈

都統勒貝等率兵攻取鬱林諸處今聞逆賊自高州句連山海諸寇來犯電白尙之信及將軍額楚等速行剿滅○丙子諭撫遠大將軍都統大學士公圖海卿向在機密重任澡德浴身志節高潔奉命西征早清巨寇宣布德意兵過之地秋毫無犯舊德老成可謂社稷之臣前者拉篤祜來知卿平安朕心良足慰也今因拉篤祜回汛故示朕意○己卯征南將軍都統穆占奏官兵恢復郴州桂陽興甯宜章諸處其地爲通粵要路幅員遼闊不可不駐兵防守欲留臣等之兵恐進剿力弱苟不設防則新復之地又復可虞乞別調官兵駐守得旨頃因茶陵攸縣地屬要區已敕大將軍簡親王不必繼穆占前進與和碩額駙華善協同鎮守仍令護軍統領哈堯山等會同穆占併力進剿今穆占旣恢復郴宜諸處當增兵防守若粵東無虞鎮守南韶將軍舒恕之兵可調來駐防若粵

東華錄

康熙二十一年

三

東可慮則勿調舒恕兵或應於簡親王兵內通融分撥或量留哈堯山兵增防並聽穆占斟酌以行尋穆占招撫僞總兵王育民等收復臨武藍山嘉禾桂陽桂東五縣因奏言臣以兵抵永興渡河進剿移文將軍華善遣兵赴永興以續我兵之後華善謂茶陵諸處留兵甚少不卽遣兵臣因將郴州永興桂陽興甯諸處令都統柏宜理布前鋒統領碩岱護軍統領喇賽副都統託岱祖澤瀆宜思孝等率兵分汛防守但新復地方不可不增兵駐鎮茶陵有滿兵每佐領四人及總兵官趙應奎與臣等所留湖廣綠旗兵又留簡親王兵一半爲數不少請於此兵內遣往郴州桂永興諸處以資防守得旨頃有旨將軍舒恕之兵應否調守郴州諸處或酌分簡親王兵或應留護軍統領哈堯山兵聽穆占酌行穆占身在地方宜悉緩急作何調兵防守仍遵前旨相機從事○辛巳以溫哀郡

王佛永輝弟延壽襲爵○奉命大將軍康親王傑書奏副都統胡圖海澄公黃芳世等於閏三月初十一日連破漳州海賊陣斬偽提督總兵等焚毀賊營獲僞印劄船隻器械無算下部議敘○戊子諭兵部吳三桂背恩倡亂所部人員向沐國恩甚久其中不無被脅者韓大任等既經投誠仍令議敘加恩其同來護軍甲兵皆國家素所養之人若輩父母妻子俱陷賊中可遣發令歸滇中俾得完聚其續至者爾逐一問明或有願歸者奏聞並發○己丑以王新命爲江西布政使由郎中遷○庚寅漳州安塘筆帖式報海逆環圍海澄我兵失利於灣腰樹賊勢益張聞海澄城中糧已匱乏賊復日犯漳州總督郎廷相奏海賊猖獗閩省兵單請調江南浙江廣東三省滿漢官兵赴援漳泉又請調三省水師戰艦並於福建召募水卒規取廈門得旨江南舟師調發岳州諸處京口亦

東華錄

康熙二十一年

三

爲濱海要地廣東之兵進勦祖逆鎮守潮州官兵及劉進忠所部官兵又調往廣西梧州署副都統孟安等已率兵往援漳州副都統雅塔理亦已率浙江大兵前赴福建此三省之兵既隨在分遣不可復行調發且目下事機救海澄爲急郎廷相乃奏請調募舟師規取廈門不合俱不准行大將軍康親王等身受全閩重寄宜將雅塔理率往之兵並黃芳世郎廷相標下增設之兵隨宜調遣務急解海澄之圍撲滅犯漳賊寇○撫遠大將軍都統大學士公圖海奏閏三月二十四日振武將軍佛尼勒參贊軍務署副都統吳丹等大敗賊眾於牛頭山香泉等處二十六日四川總督周有德參贊軍務署副都統覺和託等大敗賊眾於秦嶺等處恢復潼關堡五寨下部議敘○辛卯撫蠻滅寇將軍廣西巡撫傅宏烈奏故撫臣馬雄鎮當康熙十三年春逆賊孫延齡反叛時誓死抗賊

又密遣其子馬世濟從間道赴京師請兵孫逆覺之囚馬雄鎮於別室及康熙十六年十月吳逆僞將軍吳世琮破桂林殺孫延齡令兵士擁馬雄鎮至營偪降馬雄鎮大罵遂爲吳世琮所害並殺其幼子三郎四郎及家人等其妻妾女媳皆投繯自盡闔門殉節世所罕有而馬雄鎮幕友舉人孫成儒士陳文煥等周旋患難冒險來歸忠君信友兩全其美伏乞敕部優卹馬雄鎮一門忠義以勵臣節敘錄孫成陳文煥等以鼓義士之氣得旨據奏原任廣西巡撫馬雄鎮抗詞罵賊精忠報國並家口殉難忠貞慘烈深可憫惻作何恩卹著議政王大臣等會議具奏陳文煥等冒險來歸可嘉著一併議奏尋議原任廣西巡撫馬雄鎮俟廣西平定後查明殉難人員一併議敘其子馬世濟從間道赴京請兵殊爲可嘉應從優議敘加恩以通政使司左右通政大理寺少卿先用其幕友

東華錄

康熙二十一年

三

舉人孫成以同知用儒士陳文煥以知縣用從之○壬辰諭吏部等衙門國家設法定例原期章程盡善垂之久遠上裨軍國下益民生必期內外臣工精白乃心恪恭詳慎實心奉行方克永遵而無弊近見各處奏章凡於見行之例或借端營私巧爲掩飾或推諉卸過冀免處分或徇庇情面曲爲彌縫凡行一事每滋弊端以致良法美意澤未下究而累已及民揆諸立法初意殊爲未符此等情弊科道官雖有風聞因無確據難以指參朕雖洞悉緣由期其自行改悔不加深求遂爾因循以爲僥倖之路以後在內部院等衙門在外督撫各官俱宜滌慮洗心痛改積習於有益國家民生事務籌畫擔當不避嫌怨務期法行無弊恩被閭閻以副朕立法定制愛養斯民至意如視爲故事仍蹈前轍事經發覺定行嚴加處分著通行申飭遵行○乙未靖逆將軍甘肅提督侯張勇奏

逆賊吳三桂餽遺達賴台吉等交相連結欲圖入掠且逆賊已知松潘茂州番中有通西甯大路恐乘閒隙侵我茶馬之利得旨甘肅提督舊時原駐甘州後因川賊犯秦州故移駐蘭州若吳逆圖擾邊境不可不加固守今張勇自蘭州移鎮甘州著嚴加提備仍與大將軍公圖海等便宜籌畫○丙申諭兵部提督九門步軍統領費揚武自任事以來夙夜勤勞殫心料理緝獲賊盜搜捕奸宄使里巷甯謐輦轂肅清向來效力有年今尤克稱厥職應行議敘以示鼓勵著議奏尋議覆應加一級授爲正一品支一品官俸得旨費揚武再加一拖沙喇哈番餘如議

五月庚子朔先是諭兵部一等護衛雅塗侍讀學士格爾古德來自長沙奏言投誠僞將軍林興珠向安親王言前岳州舟師再戰林興珠皆在今我船甚多宜分其半泊君山以斷常德之道餘船

東華錄

康熙二十一年

五

泊香爐峽扁山布袋口諸處沿九貴山陸路立營以斷長沙衡州之道則岳州賊路阻塞縱有糧米而薪芻器用必致乏絕賊可不戰而斃矣王令以此奏聞可卽移文詹事宜昌阿知之至是宜昌阿奏我兵進湖後於高家廟君山扁山九貴山九馬髻諸處聯絡泊舟以斷賊路九貴山復設陸營使水陸相望我船相去不遠縱岳州賊兵出犯可以併力攻擊卽長沙衡州常德諸賊來援亦可合勢勦禦賊內外阻絕勢必窮蹙如得岳州後宜進取何地乞豫示機宜得旨宜昌阿所奏水陸大兵進攻岳州貝勒尙善等宜熟計萬全以期速克旣克之日卽乘虛速取常德澧州諸處勿令賊得爲備尙善等前以所在逗遛貽誤大事今宜殫心竭力勉圖自效毋得仍蹈前轍玩日稽時○奉命大將軍康親王傑書奏海澄危急臣已檄駐守廣東潮州將軍賴塔率所部兵之半及綠旗兵

來援餘兵令副都統倭申巴圖魯統領同靖南王耿精忠駐守潮州得旨海澄被圍日久勢在危急將軍賴塔可率兵速往救援潮州亦屬要地康親王更檄倭申巴圖魯等嚴加固守但海逆勢甚猖獗不可不增發官兵浙江既有將軍總督巡撫總兵官足以固圉應選綠旗精兵三千令提督石調聲統之速往應援如或稽遲從重治罪○海澄公黃芳世病篤奏言臣叔黃梧弟黃芳度全家殉難不遺一孤臣止一男甫及九歲臣弟總兵官黃芳泰久歷戎行備嘗險阻乞令承襲公爵尋福建總督郎廷相奏報黃芳世故上命贈芳世少保以總兵官黃芳泰襲封海澄公○癸卯諭兵部速給陣亡將士卹銀○軍前病故貝子傅喇塔觀回京師遣大臣一員侍衛十五員往奠茶酒○甲辰左副都御史劉捷奏連年以來因軍興旁午將大計暫停並停兩年舉劾一次今漸次蕩平

東華錄

康熙二十一年

五月

又屆二年舉劾之期請嚴飭各該督撫將兩年舉劾之例作速舉行更請凡督撫題補與保舉各官其中或有改行易節者該督撫一體嚴察不得徇容縱下部議行○乙巳 上至鞏華城行

孝昭皇后百日致祭禮○丙午 上回宮○征南將軍都統穆占

奏桂東桂陽山中賊首偽總兵張得恩等率領文武偽官九十餘

名兵丁八千餘人投誠○鄖陽撫治楊茂勳奏偽鎮郝一經同偽

監軍高維藩率偽文武等官四百七十名賊兵二千七百餘人投

誠○戊申撫蠻滅寇將軍廣西巡撫傅宏烈奏臣同都統勒貝等

統領官兵於四月初十三十五等自北流陸川博白進剿累敗

賊眾偽總統饒一龍等各棄城遠遁恢復鬱林州及北流興業陸

川博白等四縣得旨嘉獎下部議敘○以鄂愷爲甘肅布政使

由
遷○福建巡撫楊熙以年老休致○己酉先是 上諭吏部兵部

向以閩省海疆要地雖經恢復海逆未平民生凋敝撫綏防禦惟在文武大吏相與殫心料理方於兵民有裨今總督郎廷相提督蘇吏治未見激清營伍漫無整頓寇警頻聞地方躡擾更有甚者海賊侵犯內地事前不能豫防事後不能剿禦皆由該總督提督庸懦無才職業不修所致殊負簡任之意豈可仍令在任貽誤封疆大將軍康親王參贊大臣等會同嚴加確議具奏至是康親王傑書等奏郎廷相等應嚴加處分 上諭郎廷相段應舉俱著解任江甯提督楊捷謀勇兼優著以原銜加少保兼太子太保調補福建全省水陸提督總兵官一切剿禦賊寇保固地方戰守機宜全資殫心籌畫展布壯猷以副朕簡擢倚任至意○庚戌撫蠻滅寇將軍廣西巡撫傅宏烈奏偽總兵梁子玉賴天錫聞大兵已到東華錄

康熙二十一年

庚

鬱林把守白米嶺峒恃險負嵎我兵進剿於四月十六日黎明占據逆營斬偽總兵梁子玉生擒其兄弟二人斬賊兵五百二十餘級生擒二十一名賴天錫拔營遁走下部議敘○壬子以炎暑命大學士等清理刑獄○癸丑以姚啟聖爲福建總督由布政使遷吳興祚爲福建巡撫由按察使遷○甲寅 上幸西郊觀禾顧大學士明珠等曰朕觀古來帝王如唐虞之都兪吁咈唐太宗之聽言納諫君臣上下如家人父子情誼浹洽故能陳善閉邪各盡所懷登於至治明朝末世君臣隔越以致四方疾苦生民利弊無由上聞我太祖 太宗 世祖相傳以來上下一心滿漢文武皆爲一體情誼常令周通隱微無有閒隔一遊一豫體恤民情撻作艱難立萬

世不易之法朕雖涼德上慕前王之盛事懷遵 祖宗之家法思與天下賢才共圖治理常以家人父子之誼待臣僚罔不兢業以

前代爲明鑒也大學士明珠等奏曰 皇上所行事事上追聖帝
仰法 祖宗宵旰勤政日御宮門親理萬幾與大臣講論治道民
情隱微洞悉 聖衷臣等濫叨隆遇或掌機密或侍左右日見

皇上留心政治遊幸之際未嘗不以天下爲念臣等雖驚劣不堪
敢不勉強往代良臣以盡愚盡仰副 聖明孜孜求治之心○丁
巳 上駐蹕南苑○戊午 上御南苑前殿講官進講 上以講

章內言敬者德之聚因諭曰誠敬一理敬又爲誠之本○議政王
大臣會議江南省原止提督一員統轄因江西饒州等處地方變
亂以安慶與江西接壤特添設提督一員今江西底定安慶徽州
已屬內地江西提督楊捷員缺停其推補應將安慶提督王永譽
調爲江南提督統轄全省移駐松江從之○辛酉 上回宮○浙

江總督李之芳奏僞都督李日生等盤踞玉山縣屬八仙洞老巢

東華錄

康熙二十一年

七

臣標參將蔣懋勛等會江西官兵深入夾勦於四月十六日連破
三關攻克八仙洞十七日連破四關攻克老鼠洞共斬賊三千餘
級陣斬僞遊擊都司等員焚毀賊巢下部議敘○甲子先是厄魯
特濟農遣人至靖逆將軍甘肅提督侯張勇所言我祖願實汗以
來職貢不絕今爲噶爾丹所敗窮迫來此欲赴西海往會我叔達
賴台吉兄墨爾根台吉若由邊外繞出則行月餘中途數日乏水
如由內地行則限於 主上邊境不敢徑度祈准由內地過邊張
勇以由水泉出邊竟日可到墨爾根台吉處五日可到達賴台吉
處奏請令其由水泉過邊 上允之乃濟農逗留月餘復北向遊
牧未由水泉過邊至是濟農以布隆吉爾地方見有火光探聞噶
爾丹追迫已近竟由雙井闌入內地提督孫思克奏請率兵逐之
得旨將軍張勇見赴甘州卽著親身驗看驅逐濟農部落過邊赴

伊叔兄處所加意防護勿使擾民尋將軍張勇奏報驅逐濟農等
出邊○乙丑以梁鉉爲倉場侍郎原任工部侍郎○平南王尙之信奏臣

同副都統額赫納等親統大兵自肇慶啟行於四月十一日抵甯
白逆賊祖澤清盡選精銳據守外設五營臣等分兵攻擊連破賊
營斬賊首僞總兵江瓊等並賊黨四千餘級追殺二十餘里城中
賊黨閉門堅守臣分兵合圍一面招撫十七日夜城內原任雷協
都司王得功等率眾投誠臣料此一戰已足寒祖逆之膽因星馳
一百八十餘里卽抵高州而祖逆已挈家屬遁去十九日復高州
得旨嘉獎下部議敘○戊辰予吉安陣亡千總侯朝卬廕○是月
免江西萬安縣去年水災賦

六月庚午朔諭議政王大臣等康熙親王傑書用兵甚爲選愜自至
浙江安居無事之地及屢降嚴旨督趣始破衢州之賊進定福建

東華錄

康熙二十一年

庚

福建既平不事豫防固守俾海賊登岸遂困海澄我國家軍法嚴
明無敢輕忽浙江福建失機將士傑書未嘗察取供詞糾劾有負
委任其會議以聞尋議政王大臣等議奏傑書罷庸怠忽軍紀宜
並參贊大臣嚴行處分但見在出征破賊俟師旋察議海澄被困
之處應令盡力救援從之○諭議政王大臣等福建所有之兵汛
守沿海訖於潮州勢分力弱而解海澄之急又屬最要頃平南王
尙之信已擊敗高州逆賊令其速還會城卽率官兵馳赴潮州鎮
守其在潮州滿兵及靖南王並其所屬官兵令赴將軍賴塔喇哈
達所併力剿賊以援海澄如尙之信不能親行則速遣官兵至潮
同總兵官馬三奇防守○以高翼辰爲福建布政使由湖北拔于
成龍爲福建按察使由湖廣下○辛未福建總督郎廷相奏閩三
月十六日山賊蔡寅擁眾萬餘突犯安溪知縣李鈺同駐防千總

王國棟等率兵役丁壯士庶親身督戰殺傷賊眾無算賊遁去仍
在山立木城踞守署泉州城守營參將甯維國署提標後營遊擊
王昶等各帶兵及該道府廳調發鄉壯民兵並在籍侍讀學士李
光地募發丁壯令弟姪等統領併力進剿殺敗賊眾燒毀賊營保
全縣城興發鎮標遊擊劉應祥亦攻開倉嶺賊敗逃竄下部議敘
○癸酉諭戶部浙江江山西安等十九縣溫衢各衛所偏近閩中
首先被陷百姓困苦其康熙十六年錢糧概從蠲免併令該督撫
多方招徠避賊黎庶各還故土俾事耕墾○子貝子傅喇塔祭葬
諡惠獻○征南將軍都統穆占奏副都統托代漢軍副都統祖澤
瀉等率領官兵自桂陽州起行於四月二十八日至藍山縣大敗
僞副將王臣等於梁路堡陣斬僞副將于成民併賊兵三百餘級
餘賊敗遁下部議敘又奏萬巖山內賊首僞總兵何興等六員副

東華錄

康熙二十一年

元

將等三百餘員兵丁二萬餘名投誠○廣東廣西總督金光祖奏
惠州甲子港賊船出沒總兵官苗之秀督兵於五月二十六日與
賊戰三晝夜沈賊船一百餘隻陣斬及淹沒者二千餘人生擒二
十餘人獲僞劄船隻器械甚多海賊莫紅肉等於五月初三夜率
領賊艘突犯潮州團山等處總兵官馬三奇夸蘭大護喇等分路
堵剿斬賊七百餘級餘賊敗遁下部議敘○丁丑撫遠大將軍都
統大學士公圖海奏慶陽地方有賊首袁本秀受吳逆僞劄糾合
兇徒盤踞山林一月之間聚集千餘人窺隙作亂隨發慶陽宜君
延安三營官兵並移咨奮威將軍王進寶派撥標兵協力合剿四
月二十二日追至衛遠溝地方斬僞總兵袁本秀及僞副將參將
等並賊二百餘級餘賊潰敗下部議敘○己卯先是撫蠻滅寇將
軍廣西巡撫傅宏烈欲進兵南甯以向田州泗城至是將軍莽依

圖奏竟入南甯非策宜令將軍額楚取平樂桂林傅宏烈取南甯
兩路齊舉 上諭將軍莽依圖等向因規定廣西調遣滿漢官兵
甚多今進征田州泗城若俟他路諸軍齊集必稽時日若孤軍獨
進恐難有濟平粵事宜所繫甚重將軍莽依圖額楚傅宏烈及參
贊諸臣與總督金光祖等俟克復潯州俱赴梧州面議何路進兵
先取何地務期和衷爲國勿各圖自便○壬午諭禮部朕惟天人
感召理有固然人事失於下則天變應於上捷如影響豈曰罔稽
今時值盛夏天氣亢暘雨澤維艱炎暑特甚禾苗垂槁農事堪憂
朕用是夙夜靡甯力圖修省躬親齋戒虔禱甘霖務期精誠上達
感格天心爾部卽察例擇期以聞○甲申征南將軍都統穆占奏
僞將軍胡國柱致書於郴宜參將陳武亨不敢發函羈執賊使自
首訊知桂東桂陽降將于賢何興所賊亦致書恐彼等爲賊所煽

東華錄

康熙二十一年

三

惑得旨將軍穆占所守地方遼闊而永興見被賊侵儻降將于賢
輩復爲賊所煽惑則疆圉深屬可虞宜章地處最要若駐兵防守
其閒西可以固臨武藍山嘉禾而東至桂東桂陽降人不至搖動
宜令平南王尙之信速調鎮守韶州綠旗官兵馳赴宜章固守參
將陳武亨出首逆書忠誠可嘉該部議敘以聞○丁亥 上步禱

天壇是日大雨○先是揚威大將軍簡親王喇布奏茶陵攸縣
安仁諸處實爲江西咽喉且與賊密邇將軍穆占謂前所遣援兵
尙少更須增發臣思茶陵攸縣安仁諸處兵力甚單若再遣發如
逆賊分路出犯則大兵之路被賊阻塞而江西亦甚可虞且永興
介在茶陵安仁郴州桂陽之閒急宜擊卻永興之賊不當撤兵還
郴州請敕穆占先剿滅此賊至是穆占奏自寇侵永興臣遣駐防
郴州諸處護軍統領哈堯山喇賽前鋒統領碩岱等領滿洲蒙古

漢軍綠旗兵陸續往援並無撤兵還郴之事如果撤兵則署副都統雅秦所豈無臣印信文書此皆妄奏耳且簡親王奏云請敕臣先滅永興之賊是簡親王知臣不爲 皇上盡心而請耶抑知臣之盡心故不樂而爲此奏耶臣所在剿賊恢復疆土 皇上洞鑒但郴州甚要臣未便輕離若遣一良將來守郴州諸處俾臣率兵討永興之寇或進取耒陽必能成功得旨將軍穆占旣言郴州甚要必難輕離穆占可駐守郴州酌調官兵撲剿逆賊穆占旣未撤兵還郴署副都統雅秦前何所據竟以撤兵啟報大將軍簡親王簡親王何以竟不詳察卽行具奏其令簡親王明白回奏又諭兵部將軍穆占大將軍簡親王總統師旅受將帥之任宜求濟大事彼此和衷若爾各懷嫌隙恐誤疆場嗣今務相輯睦爾部卽行傳諭○海澄總兵官黃藍奏五月初五日夜半海賊四路攻海澄官

東華錄

康熙二十一年

三

兵力戰眾寡不敵致城外木柵礮臺俱陷賊復從高埠瞰城中火攻不絕臣以勢迫請援於將軍總督恐援兵稍遲則海澄難保得旨總兵官黃藍死守孤城忠貞懋著大將軍康親王其速檄將軍賴塔喇哈達等赴援海澄密遺書副都統伯穆赫林總兵官黃藍等如有隙可乘卽率滿漢官兵棄城突出來會漳州大軍○征南將軍都統穆占奏郴州等九州縣幅員遼闊設有賊出犯無兵可遣因檄駐守廣東南雄將軍舒恕分兵馳赴郴州今逆賊偏永興宜調江西提督趙賴往守攸縣畀和碩額駙華善將軍印卽率署前鋒統領薩克察巴圖魯滿兵總兵官趙應奎標兵由安仁進發斷耒陽賊後路毀其浮橋如不可毀則遣赴永興與副都統雅秦雅哈喇額思赫等協同固守臣盡撤所部還郴州整兵前取耒陽則逆賊自潰得旨前特授穆占爲將軍統率大兵由秦入楚自荆

州起行以來凡兵將或攜或留及調遣守禦事宜無不如奏允行
卽今破賊收疆亦皆穆占是賴此等調度俱如所請行○安遠靖
寇大將軍貝勒尙善奏臣等公會議將烏船沙船分撥令大軍
進湖隨據討逆將軍鄂內湖廣總督蔡毓榮等報六月初三日黎
明逆賊見我兵船泊柳林背君山二處乘風齊來卽令各路兵船
分道迎擊礮沈賊船擒斬僞官兵丁獲烏船僞劊器械等又水師
營總兵官萬正色標下守備陳勞等在君山看守火藥船見賊與
我兵對敵卽率看守火藥官兵迎殺賊復奔岸隨卽追擊斬僞副
將遊擊及賊兵千餘人生擒僞守備千總暨賊二百餘人下部議
敘○戊子以佟康年爲湖北按察使由江南淮揚道遷○己丑揚威大將

軍簡親王喇布奏賊偏永興茶陵攸縣諸處防兵已經調援守禦
力弱請濟師 上諭議政王大臣等簡親王喇布自抵江西未能

東華錄 康熙二十一年 三

剿除逆賊克復疆土而於失機將士復不嚴責軍狀及遣守茶陵
攸縣諸處已收復地方又不能鎮防屢以力單奏請益兵凡所題
奏率過其實此皆喇布庸劣不能效力之故俟事平旋師之日嚴
加議處大將軍安親王兵見駐長沙無論護軍甲兵每佐領選一
二人遣赴簡親王軍前且大軍旣鎮守茶陵攸縣安仁諸處則吉
安已爲內地吉安署副都統尼滿等之兵亦聽簡親王隨宜調用
尋復諭兵部長沙茶陵郴州地勢及逆賊情形久未知悉大將軍
安親王將軍穆占大將軍簡親王各遣熟識情形具諳始末奏事
傳旨不至貽誤者一人馳驛赴京安親王仍遣護衛雅塗偕來○
庚寅江西巡撫佟國楨奏興國知縣黃惟柱等招撫浪川洞僞總
兵邱興佑等五員兵七千一百人鯉公等寨僞鎮軍夫人楊氏僞
總兵曾靈等六十七員兵六千三百餘人寶石寨僞藍軍道黃捷

先等八員下部議敘○辛卯子故太子太保海澄公贈少保黃芳世祭葬謚忠襄○兵部議覆撫蠻滅寇將軍廣西巡撫傅宏烈奏臣家子女僮僕共一百四十四口標下官兵老幼約計一千八百餘口悉陷桂林應令大將軍安親王等恢復湖南桂林之時將傅宏烈家口並標下官兵家口查明收留給還從之○壬辰揚威大將軍簡親王喇布奏吳逆以大隊侵永興犯我河外營都統伯宜理布前鋒統領碩岱護軍統領哈堯山等禦之失利宜理布哈克山戰歿賊遂據我河外營環攻永興臣移文安親王令發每佐領兵二三人來援安親王遣夸蘭大塔爾拜畢力克圖率醴陵守兵每佐領一人有半馳援 上諭兵部覽大將軍簡親王等奏逆賊以大隊犯永興有必死之形由我軍每佐領一二人或數百人在遣防兵勢太分以致失利將軍穆占大將軍簡親王其速收可

東華錄

康熙二十一年

三

緩之地所有防兵還之要害會合羣力大創永興賊兵務期翦滅凡摧寇破賊必審量己力可擊則擊之如賊眾我寡即宜調集諸路合爲一軍壯其聲威以圖攻剿儻株守新復城池以己經駐鎮憚於旋師遲留疑畏於大事殊無所濟爾部明白移文速傳示穆占簡親王知之○平南王尙之信奏賊首張荒僞總兵謝琅等及海賊杜起龍環攻廉州署總兵官班紹明宋思徵領兵擊敗之解廉州圍下部議敘○癸巳予廣東陣亡都司僉書朱鴻祚官廕○甲午揚威大將軍簡親王喇布奏前鋒統領薩克察巴圖魯於本月十三日自安仁率師前赴永興賊於是夕渡河環據故營揆賊奸計虛作聲勢用偏師立營而以大隊潛赴郴州又臣等前得米百石已令遣赴永興以道路阻塞復行撤還得旨逆賊如果併力郴州永興前鋒統領薩克察巴圖魯護軍統領喇賽等共議酌量

留兵守城統率餘卒閒道馳救簡親王量所存糧米撥遣官兵相續轉運速達永興○乙未征南將軍穆占奏前鋒統領碩岱副都統託岱宜思孝等營壘被衝河之南岸失陷於賊退至郴州碩岱等奔往永興卽宜拘禁但臣軍旣已深入郴州兵力甚單而碩岱復遠在永興是以未行速繫統候裁奪目今賊之大隊及有名僞將皆併力郴州請就近發滿漢官兵守藍山嘉禾桂陽永甯諸處得旨令逆賊旣併力郴永將軍穆占可盡撤閒地防兵擊敗犯郴賊寇保固廣東江西勿致疏虞並令大將軍安親王速遣兵赴大將軍簡親王軍至日簡親王等大振軍威剿除郴州永興之賊更令廣東韶州總兵官尙之瑛遣副將一員率樂昌綠旗兵二千速赴郴州聽穆占隨宜調遣授和碩額駙華善將軍印馳至永興總統鎮守以署副都統多諾參贊軍務至於碩岱等失利卽宜速繫

東華錄

康熙二十一

三

嚴加處分但因穆占調大臣官兵所在分防致兵力單薄遂爾失機其誤事之罪穆占及碩岱俱不可辭碩岱等各暫留原任立功贖罪復諭穆占曰爾勿因永興兩次失利遂不計大事有裨與否冒昧妄動亟宜鼓舞人心振揚軍威以圖克濟果能併力破賊前罪自當渙釋○先是諭兵部海澄官兵所關甚重非尋常可比急宜奮力救援其檄趣大將軍康親王將軍賴塔喇哈達等內外夾攻務期拔出城內官兵旣而報至大兵四路進攻賊以火器拒戰我師退賊又用礮偏攻海澄 上諭康親王傑書等頃聞海澄援師退朕心甚爲被困官兵憂之此非尋常事宜奮力急爲救出切勿遲疑畏難滿漢官軍間散人反廝役有能倡率衝敵直過潮溝抵於海澄救出被困官兵者准克復上等府城例從優議敘給以官職將軍以下將士卽從前屢有失利退縮之罪俱從寬宥不必

顧戀城池但使被困官兵得出卽爲克奏膚功也大將軍康親王將軍賴塔喇哈達總督姚啟聖提督石調聲等概行曉諭滿漢官兵期慰朕懷○丁酉諭兵部朕御極以來孜孜圖治欲使天下治安兵民富庶共享雍熙不意逆賊吳三桂背恩反叛擾亂地方數年以來遣兵征討尙未授首以致出征將士披堅執銳盛夏祁寒備極勞苦且興師日久滿洲蒙古漢軍或器械朽壞馬匹倒斃借貸置辦者或年幼未經分給田畝軍資器用悉稱貸置辦者種種疾苦朕深爲憫惻但逆賊未滅不得已而用兵諸路官軍其奮勇勦除底定疆土凱旋之日一切稱貸俱令該部代償諸處調集之兵遣還汛地咸令得所朕詔諭昭如日月將示大信於天下斷不食言至於從征官兵戰陣被創尤堪軫恤勿俟大兵到齊所有應得銀兩速察給其家爾部卽傳示內外俾諭朕恤兵酬勞至意○

東華錄

康熙二十一

三

戊戌揚威大將軍簡親王喇布奏署副都統尼滿啟臣云萬安泰和諸處逆賊不時出沒吉安最爲要地而防兵甚少臣觀吉安泰和諸處正當廣東贛州水陸之衝請調可緩地方綠旗官兵赴吉安協守得旨頃已調將軍阿密達總漕帥顏保率兵前赴江西今簡親王旣請遣發綠旗官兵宜令總督董衛國酌量撥遣馳赴吉安與署副都統尼滿等協力固守至於江西綠旗官兵屢經調赴湖南見在兵力亦屬單弱董衛國可募有資力精銳兵五千人以備調遣○是月免江南徐州水災額賦



